

省菴法師遺書

省菴法師遺書

省庵法師遺書敘

省庵法師遺藁。向有流通本。其弟子際本所錄。而正因刻之者也。其淨土詩。勸發菩提心文。涅槃會發願文。別爲一錄。余從吳趨龍興寺。得一鈔本。亦本公所錄。中多詩偈。乃刻本所未及。寺僧安公屬余會三爲一。稍有芟汰。擇其切要者登之。旣卒業。以授安公。刻行于世。而以師所注雲栖發願文。東海若解。附之。余讀師勸發菩提心文。未嘗不汗浹背。涕沾衣也。昔我世尊始成正覺。歎曰。奇哉奇哉。無一衆生而不具有如來智慧。但以妄想顛倒執著。不能證得。若離妄想。一切智自然智無礙智。則得現前。吾豈不解此

諸衆生于妄想執著。何苦而不離。于如來智慧。又何憚而不證。卒乃舍父逃逝。長劫漂流。甘爲客作賤人。而不知反此無他故。不覺而已矣。菩提心者。卽覺之異名。才覺。則現前妄想執著。全是如來智慧。蓋如來智慧無體。以衆生妄想爲體。衆生妄想無體。以如來智慧爲體。如水成波。全波是水。從本以來。畢竟常住無餘涅槃故。然而覺與不覺之分。斷不可以自瞞自昧者也。于此瞿然而思。若然以解則菩提心之發。自有沛然莫禦者。此心旣發。一切智自然智無礙智。又何用他求哉。師生當像季之餘。因瞻舍利。頓發大心。其生平行在梵網。志在西方。發而爲言。披肝露膽。一

片血誠救焚拯溺。不足爲喻。眞末法之精進幢也。昔善財童子徧參知識。首于文殊。所得根本智。繼見德雲。復聞念佛法門。其卒也。普賢以十大願王導歸極樂。觀師之志事。抑何與華嚴大士。不謀而合。轍歟。或言菩提心者。徧一切處。何有智者。願東願西。答。大心凡夫。初入法界。未證無生忍。一經胎獄。便昧夙因。何如託質蓮臺。永離分段。聞法得果。分身普應。上事諸佛。下度衆生。直至泥洹。更無退轉。其爲利害。較若天淵矣。且汝謂菩提心者。徧一切處。然則自東而西。譬如一臂之伸屈。顧于一體之中。樂其屈。不樂其伸也。可謂智乎。嗚呼。師今往矣。虛空有盡。我願無盡。師之

心其何窮已矣。讀斯錄者。有能志師之志。行師之事者乎。
卽謂師現身說法可也。余當布髮承足。以諸香華而散其
處。乾隆五十一年元日淨業學人彭際清謹撰

省庵法師語錄目次

卷上

勸發菩提心文

涅槃會發願文

回向偈

并敘

念佛偈

念佛開示

示禪者念佛偈

念佛警策

示呂居士偈

警世偈

釋迦如來舍利寶塔讚

阿彌陀佛像讚

觀音大士像讚

示現觀音像讚

并敘

藥山大師書空圖讚

血書文殊像讚

淨業堂銘

寸香齋銘

齋堂銘

東銘

西銘

看經銘

浴室銘

厠室銘

臥室銘

舍利懺敘

重建涅槃會敘

涅槃會約敘

涅槃會約第二敘

禱靈纒菩薩文

與茅靜遠居士書

應赴說

然指問辯

念佛著魔辯

梅芳法師往生傳

聖眼上人往生傳

念佛規約 并引

淨業堂規約 并引

卷下

勸修淨土詩 有敘

八苦詩

發願偈

不淨觀頌 并敘

四念處頌 并敘

種樹歎

題藍田叔畫蓮華佛國圖

捨身祈雨歌 有敘

贈東阿居士二首

將赴浙中留別朔方居士

澆水囊

禮塔紀事八首

并敘

庚戌春三月余禁足於梵天寺之西院右偏額其室
曰寸香齋尊客相見略敘道話數語寸香之外念佛
而已作詩以見志并告衆云

偶成四首

念佛述懷

辭世

省庵法師傳

附錄

省庵法師語錄目次終

省庵法師語錄卷上

淨業學人彭際清重訂

勸發菩提心文

不肖愚下凡夫僧實賢泣血稽顙哀告現前大眾及當世
淨信男女等唯願慈悲少加聽察嘗聞入道要門發心爲
首修行急務立願居先願立則衆生可度心發則佛道堪
成苟不發廣大心立堅固願則縱經塵劫依然還在輪回
雖有修行總是徒勞辛苦故華嚴經云忘失菩提心修諸
善法是名魔業忘失尙爾况未發乎故知欲學如來乘必
先具發菩薩願不可緩也然心願差別其相乃多若不指

陳如何趣向。今爲大眾畧而言之。相有其八。所謂邪正真偽大小偏圓是也。云何名爲邪正真偽大小偏圓邪。世有行人。一向修行。不究自心。但知外務。或求利養。或好名聞。或貪現世欲樂。或望未來果報。如是發心。名之爲邪。既不求利養名聞。又不貪欲樂果報。唯爲生死。爲菩提。如是發心。名之爲正。念念上求佛道。心心下化衆生。聞佛道長遠。不生退怯。觀衆生難度。不生厭倦。如登萬仞之山。必窮其頂。如上九層之塔。必造其顛。如是發心。名之爲真。有罪不懺。有過不除。內濁外清。始勤終怠。雖有好心。多爲名利之所夾雜。雖有善法。復爲罪業之所染汚。如是發心。名之爲

僞衆生界盡。我願方盡。菩提道成。我願方成。如是發心。名之爲大。觀三界如牢獄。視生死如冤家。但期自度。不欲度人。如是發心。名之爲小。若於心外見有衆生。及以佛道。願度願成。功勛不忘。知見不泯。如是發心。名之爲偏。若知自性是衆生。故願度脫。自性是佛道。故願成就。不見一法離心。別有以虛空之心。發虛空之願。行虛空之行。證虛空之果。亦無虛空之相可得。如是發心。名之爲圓。知此八種差別。則知審察。知審察。則知去取。知去取。則可發心。云何審察。謂我所發心。於此八中。爲邪爲正。爲真爲僞。爲大爲小。爲偏爲圓。云何去取。所謂去邪去僞。去小去偏。取正取真。

取大取圓。如此發心。方得名爲真正發菩提心也。此菩提心。諸善中王。必有因緣。方得發起。今言因緣。畧有十種。何等爲十。一者念佛重恩故。二者念父母恩故。三者念師長恩故。四者念施主恩故。五者念衆生恩故。六者念死生苦故。七者尊重已靈故。八者懺悔業障故。九者求生淨土故。十者爲念正法得久住故。云何念佛重恩。謂我釋迦如來。最初發心。爲我等故。行菩薩道。經無量劫。備受諸苦。我造業時。佛則哀憐。方便教化。而我愚癡。不知信受。我墮地獄。佛復悲痛。欲代我苦。而我業重。不能救拔。我生人道。佛以方便。令種善根。世世生生。隨逐於我。心無暫捨。佛初出世。

我尚沈淪。今得人身。佛已滅度。何罪而生。末法。何福而預
出家。何障而不見金身。何幸而躬逢舍利。如是思惟。向使
不種善根。何以得聞佛法。不聞佛法。焉知常受佛恩。此恩
此德。邱山難喻。自非發廣大心。行菩薩道。建立佛法。救度
衆生。縱使粉骨碎身。豈能酬答。是爲發菩提心第一因緣
也。云何念父母恩。哀哀父母。生我劬勞。十月三年。懷胎乳
哺。推乾去濕。嚙苦吐甘。才得成人。指望紹繼門風。供奉祭
祀。今我等旣已出家。濫稱釋子。忝號沙門。甘旨不供。祭掃
不給。生不能養。其口體死不能導。其神靈於世間則爲大
損。於出世又無實益。兩途旣失。重罪寧逃。如是思惟。唯有

百劫千生。常行佛道。十方三世。普度衆生。則不唯一生父母。生生父母。俱蒙拔濟。不唯一人父母。人人父母。盡可超昇。是爲發菩提心第二因緣也。云何念師長恩。父母雖能生育我身。若無世閒師長。則不知禮義。若無出世師長。則不解佛法。不知禮義。則同於異類。不解佛法。則何異俗人。今我等粗知禮義。畧解佛法。袈裟被體。戒品沾身。此之重恩。從師長得。若求小果。僅能自利。今爲大乘。普願利人。則世出世閒二種師長。俱蒙利益。是爲發菩提心第三因緣也。云何念施主恩。謂我等今者。日用所資。並非已有。三時粥飯。四季衣裳。疾病所須。身口所費。此皆出自他力。將爲

我用。彼則竭力躬耕。尙難餬口。我則安坐受食。猶不稱心。彼則紡織不已。猶自艱難。我於衣服有餘。寧知愛惜。彼則華門蓬戶。擾攘終身。我則廣宇閒庭。優悠卒歲。以彼勞而供我逸。於心安乎。將他利而潤己身。於理順乎。自非悲智雙運。福慧二嚴。檀信沾恩。衆生受賜。則粒米寸絲。酬償有分。惡報寧逃。是爲發菩提心第四因緣也。云何念衆生恩。謂我與衆生。從曠劫來。世世生生。互爲父母。彼此有恩。今雖隔世昏迷。互不相識。以理推之。寧無報効。今之披毛帶角。安知非昔爲其子乎。今之螻蛄蝓飛。安知不曾爲我父乎。每見幼離父母。長而容貌都忘。何況宿世親緣。今則張

王寧記。彼其號呼於地獄之下。宛轉於餓鬼之中。苦痛誰知。飢虛安訴。我雖不見不聞。彼必求拯求濟。非經不能陳此事。非佛不能道此言。彼邪見人。何足以知此。是故菩薩觀於螻蟻。皆是過去父母。未來諸佛。常思利益。念報其恩。是爲發菩提心第五因緣也。云何念生死苦。謂我與衆生從曠劫來。常在生死。未得解脫。人間天上。此界他方。出沒萬端。昇沈片刻。俄焉而天。俄焉而人。俄焉而地獄畜生。餓鬼。黑門朝出而莫還。鑊窟暫離而又入。登刀山也。則舉體無完膚。攀劍樹也。則方寸皆割裂。熱鐵不除飢。吞之則肝腸盡爛。洋銅寧療渴。飲之則骨肉都糜。利鋸解之。則斷而

復續。巧風吹之。則死已還生。猛火城中。忍聽叫嗶之慘。煎熬盤裏。但聞苦痛之聲。冰凍始凝。則狀似青蓮藥結。血肉既裂。則身如紅藕華開。一夜死生。地下每經萬徧。一朝苦痛。人間已過百年。頻煩獄卒疲勞。誰信閻翁教誡。受時知苦。雖悔恨以何追。脫已還忘。其作業也如故。鞭驢出血。誰知吾母之悲。牽豕就屠。寧識乃翁之痛。食其子而不知。文王尙爾。噉其親而未識。凡類皆然。當年恩愛。今作冤家。昔日寇讐。今成骨肉。昔爲母而今爲婦。舊是翁而新作夫。宿命知之。則可羞可恥。天眼視之。則可笑可憐。糞穢叢中。十月包藏。難過膿血道裏。一時倒下。可憐少也。何知東西莫

辨。長而有識。貪欲便生。須臾而老病相尋。迅速而無常。又至。風火交煎。神識於中潰亂。精血既竭。皮肉自外乾枯。無一毛而不被針鑽。有一竅而皆從刀割。龜之將烹。其脫殼也。猶易。神之欲謝。其去體也。倍難。心無常主。類商賈而處處奔馳。身無定形。似房屋而頻頻遷徙。大千塵點。難窮往返之身。四海波濤。孰計別離之淚。峩峩積骨。過彼崇山。莽莽橫尸。多於大地。向使不聞佛語。此事誰見。誰聞。未覩佛經。此理寧知。寧覺。其或依前貪戀。仍舊癡迷。祇恐萬劫千生。一錯百錯。人身難得而易失。良時易往而難追。道路冥冥。別離長久。三途惡報。還自受之。痛不可言。誰當相代。興

言及此。能不寒心。是故宜應斷生死流。出愛欲海。自他兼濟。彼岸同登。曠劫殊勛。在此一舉。是爲發菩提心第六因緣也。云何尊重已靈。謂我現前一心直下。與釋迦如來無二無別。云何世尊無量劫來。早成正覺。而我等昏迷顛倒。尙做凡夫。又佛世尊。則具有無量神通智慧。功德莊嚴。而我等則但有無量業繫煩惱。生死纏縛。心性是一。迷悟天淵。靜言思之。豈不可恥。譬如無價寶珠。沒在淤泥。視同瓦礫。不加愛重。是故宜應以無量善法。對治煩惱。修德有功。則性德方顯。如珠被濯。懸在高幢。洞達光明。映蔽一切。可謂不孤佛化。不負已靈。是爲發菩提心第七因緣也。云何

懺悔業障。經言犯一吉羅。如四天王壽五百歲。墮泥犁中。吉羅小罪。尙獲此報。何況重罪。其報難言。今我等日用之中。一舉一動。恒違戒律。一殮一水。頻犯尸羅。一日所犯。亦應無量。何況終身歷劫。所起之罪。更不可言矣。且以五戒言之。十人九犯。少露多藏。五戒名爲優婆塞戒。尙不具足。何況沙彌比丘菩薩等戒。又不必言矣。問其名。則曰我比丘也。問其實。則尙不足爲優婆塞也。豈不可愧哉。當知佛戒不受則已。受則不可毀犯。不犯則已。犯則終必墮落。若非自愍愍他。自傷傷他。身口併切。聲淚俱下。普與衆生。求哀懺悔。則千生萬劫。惡報寧逃。是爲發菩提心第八因緣。

也。云何求生淨土。謂在此土修行。其進道也難。彼土往生。其成佛也易。易故。一生可致。難故。累劫未成。是以往聖前賢。人人趣向。千經萬論。處處指歸。末世修行。無越於此。然經稱少善不生。多福乃致。言多福則莫若執持名號。言多善則莫若發廣大心。是以暫持聖號。勝於布施百年。一發大心。超過修行歷劫。蓋念佛本期作佛。大心不發。則雖念奚爲。發心原爲修行淨土不生。則雖發易退。是則下菩提種。畊以念佛之犁。道果自然增長。乘大願船。入於淨土之海。西方決定往生。是爲發菩提心第九因緣也。云何令正法久住。謂我世尊無量劫來。爲我等故。修菩提道。難行能

行難忍能忍。因圓果滿。遂致成佛。既成佛已。化緣周訖。入於涅槃。正法像法。皆已滅盡。僅存末法。有教無人。邪正不分。是非莫辨。競爭人我。盡逐利名。舉目滔滔。天下皆是不知佛是何人。法是何義。僧是何名。衰殘至此。殆不忍言。每一思及。不覺淚下。我爲佛子。不能報恩。內無益於己。外無益於人。生無益於時。死無益於後。天雖高不能覆我。地雖厚不能載我。極重罪人。非我而誰。由是痛不可忍。計無所出。頓忘鄙陋。忽發大心。雖不能挽回末運。於此時。決當圖護持正法於來世。是故偕諸善友。同到道場。述爲懺摩。建茲法會。發四十八之大願。願願度生。期百千劫之深心。心

心作佛。從於今日。盡未來際。畢此一形。誓歸安養。既登九品。同入娑婆。俾得佛日重輝。法門再闡。僧海澄清。於此界人民。被化於東方。劫運爲之更延。正法得以久住。此則區區真實苦心。是爲發菩提心第十因緣也。如是十緣備識八法周知。則趣向有門。開發有地。相與得此人身。居於華夏。六根無恙。四大輕安。具有信心。幸無魔障。況今我等又得出家。又受具戒。又遇道場。又聞佛法。又瞻舍利。又修懺法。又值善友。又具勝緣。不於今日發此大心。更待何日。唯願大衆。愍我愚誠。憐我苦志。同立此願。同發是心。未發者今發。已發者增長。已增長者今令相續。勿畏難而退怯。勿

視易而輕浮。勿欲速而不久長。勿懈怠而無勇猛。勿委靡而不振起。勿因循而更期待。勿因愚鈍而一向無心。勿以根淺而自鄙無分。譬諸種樹。種久則根淺而日深。又如磨刀。磨久則刀鈍而成利。豈可因淺勿種。任其自枯。因鈍弗磨。置之無用。又若以修行爲苦。則不知懈怠尤苦。修行則勤勞暫時。安樂永劫。懈怠則偷安一世。受苦多生。况乎以淨土爲舟航。則何愁退轉。又得無生爲忍力。則何慮艱難。當知地獄罪人。尙發菩提於往劫。豈可人倫佛子。不立大願於今生。無始昏迷往者。既不可諫。而今覺悟。將來猶尙可追。然迷而未悟。固可哀憐。苟知而不行。尤爲痛惜。若懼

地獄之苦。則精進自生。若念無常之速。則懈怠不起。又須以佛法爲鞭策。善友爲提攜。造次弗離。終身依賴。則無退失之虞矣。勿言一念輕微。勿謂虛願無益。心真則事實。願廣則行深。虛空非大。心王爲大。金剛非堅。願力最堅。大衆誠能不棄我語。則菩提眷屬。從此聯姻。蓮社宗盟。自今締好。所願同生淨土。同見彌陀。同化衆生。同成正覺。則安知未來三十二相。百福莊嚴。不從今日發心立願而始也。願與大衆共勉之。幸甚幸甚。

涅槃會發願文

仰白十方三寶。釋迦本師。彌陀慈父。觀音勢至。涅槃會上

一切聖賢唯願慈悲。證明發願比丘某與現前大衆。建立此會。并發大心。有十種因緣。何等爲十。一者念佛重恩。難報故。二者念父母恩故。三者念生死苦故。四者自傷不見佛故。五者覩佛法欲滅。衆生可愍故。六者舍利難值。自欣得值故。七者涅槃難遇。生悲戀心故。八者令諸衆生。未種善根。令得下種。已種善根。令增長故。九者令諸衆生。歸佛法。僧遠離邪見故。十者與現前大衆。同發誓願。求生淨土故。卽於佛前合掌恭敬。而發誓言。第一願者。願我過去父母。歷劫親緣。承三寶力。速離惡趣。得生人天。漸次修行。悉得成佛。第二願者。願我無始以來。諸不善業。悉皆消滅。永

盡無餘。第三願者。願我無始以來。貪愛煩惱。永盡無餘。亦令衆生。皆得斷除。一切貪愛。第四願者。願我無始以來。眞恚煩惱。永盡無餘。亦令衆生。皆得斷除。一切眞恚。第五願者。願我無始以來。邪見煩惱。永盡無餘。亦令衆生。皆得斷除。一切邪見。第六願者。願我現生之內。一切魔事。皆悉遠離。一切惡報。悉皆不受。至得無生忍時。以我色身。代諸衆生。受無量苦。令其皆得一切安樂。第七願者。願我速證念佛三昧。心心無閒。念念相應。於佛菩提。永無退轉。第八願者。願我得大智慧。悉皆通達。一切佛法。第九願者。願我得大辯才。闡揚淨土法門。令無量人。咸生彼國。第十願者。願

得聞持陀羅尼門。自然記憶一切經典。爲人演說而無疲倦。第十一願者。願我得大忍力。具大觀智。不爲名聞利養之所劫奪。不爲愛憎毀譽之所傷害。於五濁世善化衆生。第十二願者。願我大小律儀。性業遮業。悉得清淨。安住梵行。成就衆生。第十三願者。願我臨命終時。預知時至。身心自在。正念分明。彌陀聖衆。持金蓮華。來迎接我。如一念頃。生極樂國。令諸聞見。咸發信心。皆得修行。生彼國土。第十四願者。願我生淨土後。悟無生忍。還來化度一切衆生。同生極樂。第十五願者。願我諸佛出世。長得值遇。親近供養。佛初成道。勸轉法輪。佛入涅槃。請久住世。法欲滅時。護持。

正法。令得久住。無佛法處。興顯佛法。開示衆生。第十六願者。願我生淨土後。速入娑婆。以神通願力。令釋迦佛法。延至彌勒出時。不使斷絕。第十七願者。願我來世。宏闡毘尼。建立正法。先以戒律攝諸衆生。後以定慧而成就之。第十八願者。願我來世。具足智慧辯才力故。令一切外道所有議論。皆悉破壞。一切邪見。同歸正見。第十九願者。願我來世。具足神通天眼。見有衆生。應折伏則折伏。應攝受則攝受。令其增長善根。調伏惡念。第二十願者。願我來世。化度衆生。知諸衆生。欲行惡法。未成就者。我現惡相而恐怖之。令其惡事皆悉不成。第二十一願者。若有衆生。欲行善法。

未成就者。我現善相而喜悅之。令其善事皆速成就。第二十二願者。若有衆生已作之罪。有慚愧心。欲懺悔者。聞我名號。乃至十惡五逆。無不消滅。第二十三願者。若諸衆生。現在作善。有懈怠心。欲退失者。聞我名號。乃至一毫之善。永無退轉。復更勤修一切善法。第二十四願者。願我入世化度衆生。於貧窮者。令得伏藏。於病苦者。令得良藥。飢渴衆生。令得飲食。裸形衆生。令得衣服。厄難衆生。解脫衆苦。失道衆生。示以正道。愚癡衆生。令得智慧。乃至一切所須。皆令果遂。使諸衆生先得世樂。後得出世無上法樂。第二十五願者。願我來世。於刀兵劫。現爲良將。殄滅干戈。於疾

疫世。現作藥草。救療衆病。於飢饉世。現作稻糧。於熱惱處。現作涼風。於枯槁處。現爲甘雨。於險阻處。現作津梁。於昏闇處。現爲燈火。隨諸衆生所欲得者。皆現作之。令諸衆生。若行若住。若坐若臥。咸得安樂。發菩提心。第二十六願者。願我來世擁護佛法。於閻浮提。現作國王大臣。威德自在。化導人民。令行佛法。於其國界。永斷殺業。不行惡事。諸有不信。謗三寶者。卽以勢力而摧伏之。第二十七願者。我於來世救度衆生。現作摩竭大魚。以自身肉。施與衆生。隨取隨生。不可窮盡。或復現作金翅鳥王。龍王。馬王。牛王。象王。諸鳥獸王等。一一類中。威德勢力。超勝一切。化諸同類。捨

離惡道發菩提心。第二十八願者。或有衆生愚癡無智。雖有信樂。不解佛法。雖修道行。不達法相。雖欲讀誦。不能記憶。雖欲坐禪。不除昏掉。乃至起心作善。便生障礙。或爲惡魔惡友之所攝者。我以神力。令其智慧開明。了達法相。一切魔事皆悉遠離。一切善法皆速成就。第二十九願者。或有衆生不具信根。無惡不造。我於是人倍生憐愍。方便教化。隨逐不捨。經無量劫。此人若不發菩提心。我終不捨慈悲救濟。第三十願者。我於來世佛法欲滅。邪魔熾盛。諸不善法聚集之時。願以大悲神力。隨有惡魔止住之處。我現極恐怖相而恐怖之。使其意欲破法。心卽迷悶。口欲謗法。

舌不能動。身欲作惡。足不得舉。徒黨破散。惡魔消滅。第三十一願者。我以度救衆生故。入於地獄。代受衆苦。其中所有一切苦事。皆集我身。令彼衆生發菩提心。生入天界。第三十二願者。若有餓鬼。猛火熾然。求索飲食而不得者。我以大悲神力。手出香乳。皆令飽滿。身心安樂。發菩提心。第三十三願者。一切畜生。以惡業故。當受刀砧。宰割種種諸苦。我以大悲神力。爲其代受。或復示入其中。令行殺者改悔修善。發菩提心。第三十四願者。有諸天衆。以天福故。憍慢放逸。我現天身。而警誡之。令其覺悟無常。速出三界。第三十五願者。若有衆生。欲求聲聞緣覺乘者。我以方便。令

其先證小果。即便回心入菩薩乘。第三十六願者。或有衆生樂著小法。毀謗大乘。復有衆生執著權教。不信圓頓。或復執空謗有。執有謗空。執著空有。毀謗中道。乃至於佛法中生種種異見者。我以智慧辯才力故。破諸異論。悉滅無餘。建立一乘無上佛法。咸令衆生於正法中。永無疑惑。第三十七願者。我爲化度行惡衆生。示同其類。不染惡法。令諸同類信服。隨從。凡所言說。悉皆聽受。漸捨惡行。修行善法。第三十八願者。我爲化度諸比丘等。示現種種方便。於比丘衆中。有盜三寶物。破齋犯戒。種種邪見。不信因果者。此人以是因緣。當墮地獄。我爲現作執金剛神諸鬼神等。

或復現作地獄之相。顯示目前種種境界而恐怖之。使其
已作之罪。發露懺悔。未作之罪。不敢復作。離地獄因。修出
世業。第三十九願者。願得無量三昧神通智慧。悉能受持
一切佛法。第四十願者。凡我所修布施持戒一切功德。悉
皆回向一切衆生。一一衆生受我施已。所有願求悉皆果
遂。所不願者。咸皆捨離。第四十一願者。一切菩薩所有無
量難行苦行。我皆修學。盡未來際。無有疲厭。第四十二願
者。一切菩薩所有慈悲誓願功德智慧。我皆攝取。無有遺
餘。第四十三願者。願我徃詣十方世界供養諸佛。以一切
華一切香一切燈一切果。一切飲食衣服幢幡寶蓋伎樂

歌舞。皆悉出過諸天所有。奉上諸佛。諸佛爲我說法之時。悉皆聽受。乃至一文一句。無有遺忘。第四十四願者。願我生生世世。不忘本願。常在此土救苦衆生。第四十五願者。願我彌勒出世。最先值遇。聞法得果。彼佛臨涅槃時。我當奉獻最後供養。如是乃至樓至如來出世。亦復如是。第四十六願者。衆生未盡。地獄未空。業海未乾。苦輪未息。我終未願先成佛道。第四十七願者。願我豎歷塵劫。橫周沙界。以無量身業。無量口業。無量意業。供養諸佛。化度衆生。第四十八願者。我若成佛。世界廣博。無量佛土。爲一佛土。佛身常住。佛法不滅。所有國界。最極莊嚴。超過一切恒沙佛。

國亦無正法像法亦無地獄餓鬼畜生阿修羅等及諸魔
魔民雖有天人皆大菩薩彼佛色身不可思議所有相好
不可思議所放光明不可思議所有眷屬不可思議所化
衆生不可思議以要言之若依若正若主若伴皆不可思
議此願不滿終不作佛發是願已復與現前大衆異口同
音而說偈言。

稽首釋迦文真身舍利塔甚深微妙法。大般涅槃經。一切
諸菩薩緣覺聲聞衆。我以至誠心發此真實願。願我先父
母累劫衆親緣彼此盡超昇。自他俱解脫。貧嗔癡永斷。戒
定慧常修。不起殺盜淫。及以諸邪見。已生惡永滅。未生更

不生。過去諸惡業。當受地獄苦。遂得無生忍。千萬倍償還。願於現世中。魔障皆消滅。又以念佛心。速證王三昧。心心無閒斷。念念得相應。於無上菩提。更不生退轉。又願得智慧。通達一切法。具無礙辯才。闡揚念佛門。得大陀羅尼。受持諸佛法。又願得忍力。具修諸觀行。裂開憎愛網。斬斷名利根。毀譽樹頭風。好醜空中迹。又願具威儀。通達毘尼藏。大乘及小乘。性業并遮業。一切悉清淨。成就諸衆生。願我命終時。正念心無亂。彌陀及聖衆。垂手共提攜。見聞皆發心。同生極樂國。見佛復聞法。獲得無生忍。還來此土中。化度於一切。供養於諸佛。護持諸佛法。釋迦法滅時。我以誓

願力。及以神通力。令法久住世。延至彌勒時。中間無斷絕。又願未來世。建立佛正法。以律攝衆生。後令得定慧。以大辯才力。破壞諸邪見。又以他心智。其知衆生心。折伏及攝受。二俱得自在。令其得利益。調伏諸惡念。惡法悉不成。善業速成就。有罪欲懺悔。聞名俱解脫。善根欲退時。皆令得增長。貧者得伏藏。病者得良藥。飢寒逼迫人。悉令得衣食。厄難得解脫。愚癡得智慧。刀兵劫起時。願我爲良將。飢饉疾疫世。願化作稻粱。及以諸藥草。徧救諸衆生。願於閻浮界。現作大國王。以法化衆生。令斷諸殺業。或現鳥獸王。攝化諸同類。具信及少信。乃至無信等。咸以諸方便。漸漸令

調伏。諸魔悉退散。徒黨盡消滅。地獄鬼畜生。上至諸天衆。我現入其中。皆令得解脫。三途離衆苦。人天出三界。聲聞及緣覺。回心入大乘。權教諸菩薩。同入一圓頓。諸行惡衆生。捨惡趣善法。末法比丘僧。種種諸邪見。我以善巧力。令其生信心。三昧悉通達。善法皆回向。菩薩悲智力。種種功德力。願我皆攝取。供養十方佛。所有諸供具。願我皆具足。我及諸大衆。皆同是願力。生生爲伴侶。處處化衆生。龍華三會中。最先蒙佛記。彼佛涅槃時。我當施飲食。衆生界未盡。成佛終無期。一切成佛時。然後登正覺。

回向偈

开教

蓋聞修行前導。莫尚乎發心。衆善指歸。莫要於回向。良由無始。迷此一心。不知諸法本空。四大非有。競執我人之見。橫生憎愛之心。所修善法。但爲己身。所得功勳。唯歸眷屬。是以徒增業果。不斷漏因。三界豈離。四生寧免。我今依教。發回向心。近將七日功勳。遠洎多生善法。但有益益。悉施衆生。捨茲有所得心。向彼真如實際。運此無生妙觀。唯求無上菩提。相與胡跪合掌。作如是言。

稽首三界尊。釋迦牟尼佛。十方三世佛。菩薩及聲聞。唯願大慈悲。共垂哀攝受。我今依佛教。普發回向心。捨茲有相心。趨向無生路。願我無始劫。乃至於今生。所有三業善。悉

皆用回向。願一切衆生。身口恒清淨。意常緣善法。不起貪
恚心。願以懺悔力。及諸誓願力。請佛久住世。復請轉法輪。
隨喜諸善根。悉施於衆生。願諸衆生類。三障悉消除。生生
常見佛。處處恒聞法。常生歡喜心。不起憎嫉念。又以香供
佛。願一切衆生。常焚持戒香。普熏於法會。又以華奉獻。願
一切衆生。禪定如華敷。見者咸欣悅。又以燈施佛。願一切
衆生。同然智慧燈。普照於法界。以香塗佛塔。願一切衆生。
忍辱如塗香。不起於憎嫉。又以果奉獻。願一切衆生。圓滿
佛菩提。同歸無上果。以食施諸佛。願一切衆生。常餐法喜
食。及以禪悅食。身心徧安樂。歡喜悉充滿。以旛供養佛。願

一切衆生。翻轉貪嗔痴。咸成戒定慧。復以蓋奉獻。願一切衆生。同以無緣慈。蓋覆於一切。又以幢奉獻。願一切衆生。同豎最勝幢。高出於三界。以財施諸佛。願一切衆生。同具七聖財。法寶咸充滿。又願爲衆生。代修回向法。權教諸菩薩。同歸圓頓門。無著四沙門。咸趨無上慧。人天有漏善。皆成無漏因。回彼世間心。同歸正覺道。深知三界苦。勿生貪著心。阿修羅衆等。捨離憍慢心。所有勝善業。悉回向佛道。龍神夜叉衆。乾達緊那羅。八部諸衆生。所有微善業。若多若少等。悉回向佛道。人道諸衆生。所有微毫福。今世若過世。盡回向佛道。地獄鬼畜生。衆苦逼迫時。若起一念善。所

有微毫福。我皆代回向。同歸正覺道。以此回向善。復施諸
衆生。普與衆冤親。一時成佛道。

念佛偈

念佛一聲。漱口三日。一句彌陀。衆罪消滅。兩家公案。是同
是別。擬議思量。八萬億劫。

念佛開示

樓上念彌陀。樓下彌陀念。東房魚子響。西房佛聲現。喫飯
與穿衣。涕唾大小便。一句阿彌陀。打教成一片。現在卽西
方。何必臨終見。

示禪者念佛偈

一句彌陀。頭則公案無別商量。直下便判。如大火聚。觸之則燒。如太阿劍。撻之則爛。八萬四千法藏。六字全收。一千七百公案。一刀斬斷。任他佛不喜聞。我自心心憶念。請君不必多言。只要一心不亂。

念佛警策

生死難脫。輪回難避。淨念難純。妄心難制。勿學虛頭。勿談雜語。奉勸諸人。切莫容易。

示呂居士偈

念佛無難事。所難在一心。一心亦無難。難在斷愛根。當觀此身體。臭穢難具論。內外及中間。無一清淨物。已身既如

此它身亦復然。深生厭惡心。慎勿生貪著。當觀極樂國。純是蓮華生。不假父母胎。壽命原無量。一念念佛時。蓮華卽化生。若能無間斷。決定生安養。

警世偈

茫茫大夢中。長夜誰能寤。反戀夢中歡。將醒還重做。做得不如前。一錯是百錯。做得勝如前。依然空懨懨。造了夢中業。從苦又入苦。勸君早回頭。直走西方路。萬緣都放下。勤修淨業課。日夜望還鄉。一心求覺悟。豁然心地空。卽是真淨土。彌陀忽現前。原來是這箇。

釋迦如來舍利寶塔讚

我佛降跡。於彼中天。示現入滅。經於百年。有阿育王。造舍利塔。衆香爲泥。七寶爲末。役彼鬼神。終夜告成。八萬四千。遍四海濱。此震旦國。處有十九。唯茲四明。靈踪僅覲。西晉之世。地在并州。有一獵師。厥姓曰劉。示入地獄。大士告語。汝若懺悔。可求舍利。醒而出家。易名慧達。遠來四明。尋求寶塔。忽聞鐘聲。從地而來。頂禮七日。山巖自開。千年聖迹。於茲顯現。遂令有緣。佛身親見。至今鄒峯。靈異非常。四方瞻仰。見相見光。圖之刻之。以傳四方。我作讚詞。稽首法王。

阿彌陀佛像讚

南無阿彌陀。何人不知念。雖念不相應。母子難相見。行住

及坐臥時將此心斂。念念自相續。念求成一片。如此念彌陀。彌陀自然現。西方決定生。終身無退轉。

觀音大士像讚

大士法身。非男非女。身尚非身。復何所倚。以慈悲力。頂現化佛。以禪觀力。手執如意。示現威德。身乘怒貌。折攝並運。慈忍雙垂。普告佛子。不應取相。菩薩是汝。非畫非像。又復應知。自他不二。能如是觀。真不思議。

示現觀音像讚

并敘

南郭顧善人家。素事佛。丙申六月十九日。大士現像於竹簾上。儀容儼然。觀者如堵。無何。有燒之者。相忽不見。

善人追慕之。乃倩工繪其像。以申供養焉。

大士示迹。俯應羣生。寒潭印月。空谷傳聲。衆生本覺。皆觀自在。逐色尋聲。流轉苦海。以苦爲機。乃可得度。策之以信。驅之以悟。故我大士。游戲神通。於簾幙間。儼覩聖容。聖容非小。簾幙非大。片片真身。塵塵法界。此方之人。靡不惕虔。香花是奉。燈火恒然。應緣而來。緣盡則去。其應唯何。唯誠斯致。乃繪水墨。以申供養。爰作讚詞。以傳無量。

藥山大師書空圖讚

太虛空中。了無形相。舉筆作書。是何模樣。字旣無跡。筆亦非真。反求書者。復是何人。離紙無畫。離畫無紙。是紙是畫。

爲一爲二。拈此一義。以問藥公。怡然不語。笑破虛空。

血書文殊像讚

子以血爲墨。畫出文殊相。我以筆爲舌。讚歎申供養。閣筆試問子。何者是文殊。爲是血與紙。爲復二俱非。子乃俛而答。文殊孰非是。筆筆皆文殊。縱橫盈素紙。頂中現化佛。變化乘獅子。毫端入三昧。筆墨非遊戲。嗚呼吾與子。二者俱顛倒。若遇真文殊。啞然當一笑。

淨業堂銘

堂名淨業。其義唯何。唯精唯一。專念彌陀。心苟不一。業則不淨。唯昏與散。適生厥病。咨爾衆等。出入斯戶。宜時檢察。

爲勤爲惰。惰宜發憤。勤宜進步。盡此一生。彌陀決觀。

寸香齋銘

尊客相逢。勿談世諦。寸香爲期。唯道是語。不近人情。不拘俗禮。知我罪我。聽之而已。

齋堂銘

粒米莖菜。皆從施得。分別未忘。一口難食。擎盂舉筋。唯佛是憶。喫著真味。方能酬德。

東銘

父母生汝。師友成汝。汝今負恩。不孝不悌。佛念未純。妄心未制。汝卽地獄。地獄卽汝。

西銘

施主造堂。檀那供食。資汝念佛。宜自盡力。切莫閒斷。最忌夾雜。策汝身心。慎勿放逸。

看經銘

佛固當崇。法尤宜解。匪佛疇師。匪法奚範。是經所在。則爲佛在。克敬克誠。勿昏勿怠。一念稍失。衆魔紛然。散風動地。昏霧迷天。制之何由。念力是強。唯堅唯勇。昏散斯降。心原湛然。究竟清淨。佛法雙忘。非藥非病。

浴室銘

四大本空。將何爲洗。一心叵得。念從何起。念尙不有。佛復

何存。能如是念。決觀慈尊。

廁室銘

大小便時。毋忘正念。九孔常流。此身可厭。但當棄舍。蓮胎轉變。念念彌陀。西方定現。

臥室銘

昔人報怨。臥薪嘗膽。廿載辛勤。大事斯辦。生死爲寤。受害已深。如何睡眠。縱恣身心。三界無安。不宜久住。勤修正觀。早求出世。蓮華佛國。其樂洋洋。歸去來兮。無忘故鄉。

舍利懺敘

蓋聞法身無象。因萬物以賦形。道體無方。隨衆生而應跡。

爰自雙林示寂。中夜還原。玉毫歛影於人閒。寶相潛輝於
宇內。所遺舍利。三分攸分。乃造浮圖。八國是奉。屬當五天
之地。經歷一百餘年。爰有聖君。厥名阿育。乘鐵輪而應世。
受佛記以爲王。志在福田。心存佛法。甫聞舍利。始事請求。
於是塞恒水之刀輪。機關不轉。開世王之寶篋。油火纔乾。
育王經云。阿闍世王取佛舍利藏恒河中。作千歲燈。供養
中安金篋。用盛舍利。外置刀輪四面。旋轉流水。激之輪無
停晷。阿育王欲取之。殆不能得。有蓮華比丘。教以擲柰
塞之輪。卽不轉。乃下取舍利。纔開金篋。油盡火滅矣。乃
役鬼神之智力。載求羅漢之神通。集衆香以成泥。碎七寶
而爲末。八萬四千之佛塔。中夜造成。三千三百之人。寔卽
時分布。百神奮足。爭馳五指之光。萬鬼昂頭。齊覩半空之

臂。育王志云。阿育王取佛舍利。令諸鬼神以香泥七寶。一夜造成。入萬四千塔。請邪舍尊者舒指。放光八萬四千道。諸鬼神各隨一光。盡處安置。一塔尊者於虛空中。以塔手障日。諸鬼神望之。普天之內。一日之中。同時下塔。塔廟於焉始盛。佛法由是大興。彼居中夏。數乃衆多。此屬東方。處唯十九。阿育造塔之歲。則是周厲王之共和年也。自餘諸處聖跡罕存。唯茲四明。靈踪尙著。昔在西晉。年曰太康。有并州劉薩訶者。利賓菩薩也。愍衆生之造業。示同類以化人。罹罪而入幽冥。懼苦而求救援。梵僧指示。舍利是求。覺而發心。尋卽改業。出身應世。暫爲畋獵之民。大士出家。還作比丘之相。於是北背并汾。南游江浙。慕淨圖而顧盼。念舍利以追尋。萬里關山。豈憚馳驅之苦。數年道路。寧

知跋涉之勞。由是登陟鄒峰。徘徊玉几。鐘韻忽聞於地下。塔婆高湧於巖頭。一片青山。顯出千年之聖跡。數重磐石。長留萬古之神踪。從茲建塔度僧。藉僧守塔。地號東南佛國。僧稱累代人龍。迨乎有梁啓運。茲山之額號始彰。太宗肇興。厥寺之篇題重煥。嘉祥屢發。靈異疊生。或垂相好於塔中。或放光明於松頂。或數旬禮拜。慈親離冥報之殃。或頻月熏修。尊者獲印文之瑞。乃至或然一臂。神歸淨土。九蓮。或捨全身。親證念佛三昧。實賢自悲生。晚不能親覩佛身。幸喜緣深。猶得躬逢聖跡。於己亥夏。特申瞻禮。恭詣此山。三月安居。六時悔過。但以凡誠淺劣。難叩慈悲。宿業深

沈未蒙感應。是以重進行儀。再申懇到。終身從事。畢命爲期。不唯自省過愆。亦與人同懺悔。沈疴未起。每憐同病之人。浪子不歸。頻下思親之淚。文無足觀。義或可取。所冀障山翻倒。轉成功德之山。業海乾枯。化爲智慧之海。六根都攝。修淨業於此身。三昧早成。見彌陀於卽世。凡我同志。毋忘此心。同垂願力於千生。共報佛恩於萬劫云爾。

重建涅槃懺會敘

蓋聞覺王西逝。乃當周穆之年。像教東流。爰在漢明之世。由迦維而達震旦。計其道路。僅云十萬八千。從正像以逮今時。筭以春秋。幾見二千七百。痛哉末世。孰挽頽風。傷矣

吾徒。罔遵遺誨。仲春方屆。疇興鶴樹之悲。白月既圓。誰效
純陀之供。實賢少慕尊儀。長思聖範。對金容而垂淚。讀遺
教以興哀。曾於阿育王山。啟建涅槃勝會。十年禮懺。頻瞻
我佛之真身。百味香羞。屢奉世尊之寶塔。茲念四方善信。
跋涉唯艱。千里道塗。閒關莫致。以法從人則易。將人就法
則難。由是捨難就易。取近置遙。人無勞苦之心。財省往來
之費。茲約來歲仲春二月。既望。恭就仙林講寺菩薩戒壇。
頂禮十日之懺摩。供獻百味之飲食。續開佳會。移創法筵。
伏望若緇若素。同到道場。乃釋乃儒。咸臻勝地。摧邪輔正。
必存外護之人。起弊扶衰。是在同袍之士。發心勝則因果。

殊常作事真則人天感格。修行徑路。捨淨土則我將安歸。改過法門。匪懺摩則人無自洗。應起難遭之想。勿存輕慢之心。所願二懺同修。事觀與理觀雙運。三身並念。他佛與己佛齊彰。無始昏迷。長風起而陰霾絕點。多生罪障。太陽出而冰雪俱消。三昧成於現身。九品生於後世。然後再興悲願。回入塵勞。挽旣倒之狂瀾。重歸大海。捧已沈之佛日。復照高山。此誠不肖之愚意。願與諸賢共勉云爾。

涅槃會約敘

嘗讀涅槃經。佛臨涅槃。人天獻供。大衆悲哀。舉身血現。如波羅奢華。至有不忍見佛入滅。先取滅度者。嗚呼。何其悲。

哀戀慕。一至於此。今去佛日遠。時當末法。出家之衆。於佛
涅槃日。莫知獻供。罔有悲哀。并不知是日爲佛滅度之辰。
噫。爲佛弟子。豈宜如是邪。夫佛涅槃日。猶父母忌辰。爲人
子。而不知其親之忌日。可謂孝乎。於是日而不思致祭。可
謂敬乎。世間出世。雖有不同。所以致其孝敬之心。則一也。
蓋世間父母。生我色身。養我報命。雖是重恩。有時而盡。雖
然慈愛。亦有偏頗。雖復劬勞。亦有休息。出世父母。則不如
是。生我法身。養我慧命。推我以人天之乾。去我以三途之
濕。薰我以無常之苦。吐我以常住之甘。哺我以定慧之乳。
覆我以慚愧之衣。保持愛護。靡所不盡。晝夜殷勤。撫育其

子。經無量劫。未嘗休息。亦不念勞苦。唯知愛子爲念。不顧於他。方其幼稚。則憂其墮落。及其成立。又憂其夭喪。所以慈悲愛念。無有已時。又不於善子而生愛。於惡子而生憎。心常平等。覆護無偏。但以諸子愚癡。悞服毒藥。慈父於此。設爲方便。留藥遠出。遣使還告。汝父已死。而實不死也。毒者何。煩惱之謂也。藥者何。佛法之謂也。方便者何。涅槃之謂也。遣使者何。舍利之謂也。當知如來憐愍我等。故方便示現入於涅槃。實不滅度也。佛於衆生有此恩德。而諸衆生冥然不知。可不哀邪。夫如來舍利。震旦國中雖有一十九處。聖跡罕存。唯鄧峰一處。至今尚在。靈異非一。豈非四

明之人夙植善根。於末世中。得觀如來應化之事。雖諸佛法身徧一切處。而應身攝化。蓋有其方。舍利所在。則爲佛在。是故當知。雖居末世。有信則長奉慈顏。縱遇佛與。無信則還同不見。是則我等之所當策勤精進。而生慶幸。難遭之想者也。實賢根機下劣。德薄垢重。於現世中。不獲見識。今與衆等。建立斯會。每年一舉。畢世爲期。頂禮七日之懺摩。奉獻百味之飲食。敢云最後之供。實表戀慕之誠。所作功德。不爲自利。普施衆生。不求人天。但期淨土。庶幾爲未來得度因緣。作往生見佛方便。用報佛恩於萬一耳。然有始鮮終。聖人所誡。初勤後怠。人之常情。不以誓願自要。何

以保其永久。不以軌則爲準。何以約束身心。於是斟酌事宜。設爲規約。以告大衆。如或事可通行。願共相保守。如其不可。幸有以教之。規約別載
涅槃懺後

涅槃會約第二敘

余自幼出家。每于大僧衆中。叩諸長老曰。如來涅槃爲在何時。衆皆罔對。或有指陳。進退無據。心竊疑焉。又頻見僧俗營齋供佛。多不如法。往往以人所不堪食者。陳列几筵。以爲供養。非唯無福。且招慢佛之過。恒用慨然。及長。遊歷講肆。按覽藏文。閱讀涅槃經。始知如來于二月十五日。日初出時。放光集衆。自言今日當般涅槃。大衆蒙光。一時普

集當此之時。獻供如雲。揮淚如雨。幢幡際天。殺膳布地。盡世閒之六味。極天上之五塵。無一不備矣。嗚呼。何其盛邪。又嘗讀淨覺法師禮讚文。見其偈讚。次第摹寫如來涅槃相貌。如在目前。備極戀慕之意。則知古人亦有同吾心者。第近世罕有舉行之耳。己亥春。從西泠渡江。恭詣四明阿育王山。瞻禮釋迦如來真身舍利。遂卽其處。度夏禮塔。安居。旣竟。然一指供佛。心猶歉然未足也。旣而往永福水陸期中。偶與同輩論及供佛之事。一時發心者卽有數人。尋往蘇杭買供。採訪百味。貿易香花。次年春。復還此山。于佛涅槃日。鳩集數子。首創斯會。蓋主于爲佛忌日。追遠報恩。

以申戀慕之意。供雖不豐。務存精潔。食須三德。不乾不濕。菜須六味。非生非冷。果須珍異。非賤非粗。于中首日供佛。依禮讚文。次日禮懺。則自述儀軌。至第七日。懺事既畢。以念佛回向終焉。衆皆嘆曰。此未曾有也。四明天下勝地。舍利吾佛真身。今四方善友一時來會。成此勝舉。是非小緣。此不可以輒已也。今而後當每年一舉。畢世爲期。此爲佛弟子分內所必當爲之事。不得與尋常應期禮懺受施。諷經。同日而論也。余告衆曰。此會難事有三。如來舍利。震旦國中雖有一十九處。歲月旣遠。聖跡湮沒。唯鄧陰一處至今現存。曠劫有緣。幸得瞻仰。一難也。如來滅度二千餘載。

涅槃獻供。在古則有。在今罕聞。今與衆等宿緣所追千里相值。四方來會。七日同修。此世界中。豈非希有。二難也。諸方結社起期。所在皆有。然佛家弟子。但聞禮懺得財。未聞捨財禮懺。道念未生。利心先起。今則不然。誠敬發于心中。財物捨諸身外。慙惶不暇。敢厭勤勞。報答未能。實懷戀慕。如此心念。非佛不知。三難也。言未既。有難于傍者曰。吾聞諸佛法身徧一切處。本無出世。及以涅槃。既無涅槃。安有忌日。至于禪宗門下。單提正令。佛祖尙無安立。焉有所謂掃塔獻供之事乎。今乃于無生滅中。妄見生滅。羅百味以供之。集四衆以禮之。又不于所居庵院。致獻尊儀。而必遠

詣鄒峰。偏崇舍利。豈非捨近求遠。著境迷心。不達理性邪。子曰。子之所言理也。今吾以事問子。子以實答之。可乎。對曰。可。因問之曰。子有二親在否。曰。少也不幸。早從見背。久失恃怙矣。曰。子父母身亡。神其亡否。曰。神則未嘗亡也。又問曰。神有定所否。對曰。神既無形。又安有定所乎。曰。然則歲時致祭。亦上父母墳墓否。曰。某雖不孝。于茲禮數。尚不敢闕。子曰。子過矣。子父母而神在。則未嘗死也。未嘗死而祭之。是滅其神也。祭已滅之神。誰爲受饗者。又神既無形。無有定所。則不局墳墓中。一念至誠。必能通格。何必近離家室。遠赴墳廬。僕僕道途。舟車往返。以爲祭埽之規乎。對

曰。雖知父母神在。而形骸不存。故饗其神。神雖不食。猶食也。譬如夢中得食。飢飽宛然。不亦類是乎。雖神無定所。必有依馮。故爲之墳墓以祭掃之。所以慰死者之神。而盡生人之道也。余曰。如知此。則子之所難通矣。蓋亦思之哉。子知法身常住。而不知應迹云亡。知法體徧周。而不知應跡有所。不有應迹。安顯法身。不有舍利。誰知應跡。旣言法身常住。豈有間于應身。旣曰法體徧周。寧獨隔于舍利。子欲撥事求理。棄有談空。事相尙迷。况通理性邪。昔大迦葉將入雞足山。待彌勒佛。必往天上龍宮。及于世間。徧禮諸塔。後方入定。夫迦葉宗門之鼻祖也。豈其不達理性而然邪。

當知如來涅槃不可思議。非常非斷。離有離無。不應以偏見而生分別。以子所執法身常住。不達如來善權方便。利益衆生之事。良由不深明理教而致然耳。如經所說。譬如嬰兒。母常在側。子母不生難遭之想。母方去時。便生渴仰思戀之心。如來涅槃意。蓋如是。吾子其知之邪。或曰。子之所言是矣。然吾聞孔子曰。二簋可用享。禴祭勝于殺牛。奚取于百味乎。曰。孔子之言。蓋昭明德爲重。不以厚祭爲尊。非謂定于二簋也。如讚武王周公之孝曰。春秋修其祖廟。陳其宗器。設其裳衣。薦其時食。言時食。謂四時之食。各有其物。則非二簋明矣。又讚大禹曰。菲飲食而致孝乎鬼神。

觀夫致孝之言。則自奉雖儉。祭神必豐。又可知矣。至若菩薩供佛。則盡世甘美。猶不爲多。況區區百味乎哉。或又曰。普賢行願云。諸供養中。法供養最。今我子不修法供。專事有爲。豈菩薩用心乎。子曰。子又錯解經旨矣。經意以爲香華供養。一一皆從菩薩大悲大願之所流出。大行大力之所成就。蓋是卽財論法。事理圓融。故稱法供。如子所解。則普賢種種莊嚴供養。皆是有爲。則爲自毀矣。豈經意乎。當知敬佛雖主內心。亦兼外物。必若有心無力。則物雖輕而亦重。如其有力無心。則物雖重而猶輕。與其有力無心。寧貴有心無力。必心力兩盡。內外交資。則事理雙融。然後爲

得也。今也內無誠敬。外有吝財。浪說唯心。心將安在。大抵
末世人情。貴俗賤真。重人輕佛。待賓客則廣設嘉肴。供聖
賢則畧陳粗饌。其自奉也。朝朝每擇肥鮮。其事佛也。旦日
不存甘旨。言香則祇要心香。不須蘇合。言果則唯尊道果。
豈重菴羅。法供爲上。何必世財。禪悅自資。奚須段食。慳囊
固塞。借佛語以飾凡情。善種薄栽。立慢幢而增見刺。又或
見貴人則趨走逢迎。對佛像則倚臥不起。暫時聞法。則便
起昏沈。終日劇談。則曾無懈倦。嬉游雜務。百忙中儘有工
夫。供佛燒香。片刻閒畧無閒暇。貪名逐利。則頻年道路。不
憚驅馳。禮懺誦經。則暫入壇場。便生勞倦。纔念佛。則曰口

酸。適禮拜又云腰痛。此皆舉世之通病。我輩所當深思而痛戒者也。子不肖。不能克踐古人。擔荷斯道。爲法門之罪人。無所逃責。今建斯會。竊欲上報佛恩。下救時蔽。而人微德薄。不自知其不可也。吾子尙不以人廢言。幸加察焉。于是難者悚然自失。赧然自愧。曰我過矣。我過矣。今而後吾不敢復議矣。復再拜稽首曰。子旣善其始。當圖善其終。不有規約。何以行諸久遠乎。因徇社友之請。畧陳條例如左。并論次其語。弁諸簡端。以爲後來者告云。

禱靈鰻菩薩文

唯康熙壬辰六月十七日。苾芻實賢謹齋香燭之儀。致禱

於阿育王山金沙井護塔靈鰻菩薩曰。我聞大士。擁護佛法。作大龍王。覆庇一方。保安萬姓。在昔爲國獻功。爲民降澤。解三軍之焦渴。力運清泉。潤大地之乾枯。普施甘雨。故使先朝降勅。宣封尊號。并令有司歲殺一豕致祭。以報功澤。苾芻實賢。今來此山。頂禮佛塔。已及兩度。親覩宰殺之事。哀聲徹耳。殆不忍聞。悲痛切心。寧能自己。是以投書潭中。哀告大士。大士護持佛法。救世安民。功德溥矣。利益深矣。令有司宰殺。雖國家之命。非大士之心。然業之所造。蓋有其因。罪之所歸。豈無其主。不歸大士。將安歸邪。大士既護佛法。當體佛心。佛心非他。卽衆生是。離衆生無佛。離佛

無衆生。奈何使未來諸佛長受苦惱而不思救濟邪。且夫大士神通能消枯渴於三軍。不能免苦痛於一豕邪。能施甘雨於天下。不能全性命於衆生邪。人何幸而蒙庇。豕何辜而弗恤邪。將毋貪著口腹。假手於屠人而受馨香之味邪。夫大士尚不愛自己身命。况貪衆生之血肉邪。今欲安樂衆生。豈反加之殺害邪。我爲佛遺教弟子。持佛禁戒。當以佛語宣示於人。此而不言。孰可言者。今爲大士陳其過失。略有十種。唯神察之。夫大士度生。慈悲爲本。苟無此心。則非菩薩大士。旣稱菩薩。奈何不斷殺生。殺生不斷。是則無慈悲心。其過一也。大士視人猶己。視物猶人。今雖濟人。

尙不及物。是則乖平等心。其過二也。旣爲佛弟子。豈可不持佛戒。縱不受五戒。殺戒須持。大士不持。是則違佛律儀。其過三也。十不善業。殺業居先。大士雖非自作。故是教他。旣不禁止。任其宰殺。非教他而何。是謂現作惡因。其過四也。因必有果。所謂三惡道及多病短命二種果報。如此果報。皆由殺生。是則當招惡果。其過五也。僧伽藍地。凡聖同居。佛塔所存。護法諸天長來供養。今使血塗蔓草。腥污壇場。天神見之。必生瞋怒。僧衆居之。亦所不安。是則汚伽藍地。其過六也。累年宰殺。當有的人生不信心。謂靈鰻若是菩薩。不應食肉。舍利威神若有靈者。應不使其殺害衆生。是

故當知佛無靈驗。魚非菩薩。如此不信。過由大士。是則使人毀謗。其過七也。大士旣墮龍身。當勤修善業。速離惡趣。今造此業。何時當脫此身邪。是則難離惡趣。其過八也。如經中說。娑竭龍王告金翅鳥曰。我自生此海中。未嘗觸害水性衆生。捨此身後。當生西方極樂世界。大士今爲殺業。云何當得往生。是謂難生淨土。其過九也。大士修因。本期佛果。不斷殺業。云何當得無上果報。是則難成佛道。其過十也。一殺而具十過。罪孰大焉。反此十過。則成十德。大士何爲甘造雜業。不修純善邪。爲大士計。以神力致夢於朝廷。明以告曰。我爲佛弟子。持不殺戒。今而後無殺生。見祭

朝廷知之。必尋改先朝舊例。雖猪豚之一死。未必能逃而死。不由於大士矣。如上所陳。非爲衆生。乃爲大士。大士若能改革。則爲自救。非救衆生。大士尤宜懺悔故業。勿造新殃。發菩提心。修持淨戒。如此則衆生可度。佛道可成。菩薩之名。不爲虛得矣。大士若能見聽。何善如之。如不見聽。或恣其宿習。逞其暴怒。卽震雷激電。摧滅我身。亦所弗惜也。唯神圖之。

與茅靜遠居士書

前三月下旬。返自四明。過訪居士。適遇它出。悵然而去。尋歸回龍。茲又一月餘矣。因數子相勸。欲講法華。特到杭請

經因得致書於足下。居士造橋事畢。可謂莫大之功。然居士之心。好善無倦。一善甫完。復作一善。美則美矣。其如生死大事。何。苟不以生死大事爲急。而孳孳爲善。所作善事。如須彌山。皆生死業緣。有何了日。善事彌多。生死彌廣。一念愛心。萬劫纏縛。可不懼邪。居士世間公案。久已參透。西方淨業。久已修習。然而生死心不切。家緣撇不下。人情謝不去。念佛心不專。何也。將名根不斷邪。抑愛念牽纏邪。于此二者。宜加審察。苟不把家緣世事一刀斬斷。六字洪名。盡力提起。欲望娑婆之脫。安養之生。難矣。不生安養而欲脫生死。不脫生死而欲免墮落。抑又難矣。縱一生兩生不

失人身。濟得甚麼事。嗟乎。居士慧心如此。明利家緣如此。豐足繼嗣如此。賢能事事適意。尙不能放下萬緣。一心念佛。爲天負人邪。爲人負天邪。不以念佛爲急。而以世間小善爲急。不以生死大事爲先。而以人天福報爲先。是不知先後也。居士雖不求福。而常作福。雖欲出生死。而反入生死。皆由不知所緩在彼。所急在此。致使北轅適越。卻步求前也。居士今日要務。唯當謝絕人事。一心念佛。加以齋戒二字。尤爲盡美。大抵西方佛國。非悠悠散善所能致。萬劫生死。非因循怠惰所能脫。無常迅速。旦莫卽至。安得不爲之早辦邪。衲所知識者甚寡。知識之中。求可以語此事者。

尤寡。捨居士一人。而深以期望者誰哉。倘不以人廢言。幸加努力。若曰吾不能也。則亦無可奈何矣。

應赴說

或問曰。應赴之說。始於何時。余曰。古未之聞也。昔白起爲秦將。坑長平降卒四十萬。死入地獄。至梁武帝時。致夢於帝。乞所以濟拔之方。帝覺而謀諸誌公。公曰。聞大藏中有水陸儀文一卷。如法行持。可以濟拔。於是集天下高僧。建水陸道場。七晝夜。一時名僧咸赴。其請應赴之說。蓋自此始。昔佛在世時。爲法施主。以法教化衆生。人閒天上。莫不以五時八教。次第調停。而成熟之。諸弟子亦各分化一方。

恢宏其道。迨佛滅度後。阿難等結集三藏。流通法寶。至漢明帝時。佛法始入震旦。正法像法。漸入澆漓。奈何後世。取以博衣食之資。使法王大寶爲販賣之具。嗟乎異哉。或曰。佛法本以濟人。人來求法。我應其請。彼以財施。我以法施。何不可之有。設使人人高蹈絕俗。不通應赴。則是杜衆生求法之路。塞亡靈濟苦之門。豈菩薩之本心。諸佛之遺意邪。余曰。度生一事。誠非多事。自旣未度焉。能度人。譬如從井救人。人俱陷溺。故經云。不能自度而能度人者。無有是處。且夫施者與而取之之謂也。今我以法與人。人以財與我。是之謂貿易。何以爲施。况本無法與人乎。縱有虔誠之

功不贖貪求財利之過。又况未必虔誠而得人利養。是之謂盜施主物。又謂之負債用。律有明文。呵責非細。今夫農夫竭其股肱之力。行人殫其手足之勞。粒米百工。汗多食少。以彼血汗。爲我飲食。我僧人十指不點水。百事不干懷。誦經則曰口酸禮懺則曰腰痛。無恭敬心。無慚愧意。彼亡者在地獄中。望汝度脫。施主在家室內。望汝延生。汝何爲安坐受食。略不思念。其爲罪何如邪。不坐鐵床而飲洋銅。無有是處。自身墮落之不暇。又安能濟度衆生邪。或曰。然則應赴一事。不可爲歟。余曰。非謂其不可爲。正言其不易也。古有瑜伽一事。乃登地菩薩利生之事。非初心凡夫所

宜。或曰。然則如之何而可。余曰。必不得已。則有一說。應其請。生難遭想。入其家。生道場想。對經典。如對佛想。誦其文。思其義。行其事。踐其實。必使身與口合。口與心合。不昏沈。不散亂。不懈怠。不厭不倦。不貪求。不計利。知因知果。知慚知愧。兢兢焉業業焉。若涉大川而履薄冰也。如是則不期度生而自度。不期利益而自利益。孔子曰。祿在其中矣。自既得度。他亦復然。若夫鼓橐籥而爲經春杵。確而成禮。身對尊像而目視他方。口誦佛言而心存妄念。吾見其口食信施。卽同鐵丸。身著袈裟。卽同鐵鑊。如是則不待身後墮落。卽今早已墮落。不待未來受苦。卽今已受無量大苦。寶

梁經云。比丘不修比丘法。大千無唾處。明文灼然。可爲誠訓。慎之哉。問者慚服而退。余因錄其語爲應赴說。

然指問辯

客有問於省庵曰。然指一法。起於釋氏。從上諸師或讚或毀。好惡不一。是非莫定。願吾子一言以決其疑。省庵曰。善哉。問也。斯固有關於佛教。而人情之所易惑者也。不尅論其所以然。則是非邪正何由決了。好惡讚毀未免偏頗。今爲子統括古今。備陳差別。略有六種。唯吾子察焉。所謂六種差別者。一內外邪正差別。二儒釋立教差別。三大小開遮差別。四諸師宗趣差別。五聖凡因果差別。六心行是非

差別。知此六種差別。則是非邪正。皎如指掌。不復生疑惑矣。夫迷緣起之正理。執斷常之邪見。投灰事火。五熱炙身。用此苦因。冀招樂果。外道所以爲邪也。內修理觀爲正行。外假苦行爲助緣。或爇一香。或然一指。以此堅其誓願。大其心志。身見旣破。我執亦忘。內教所以爲正也。儒教主乎治身。身爲父母遺體。固宜全受全歸。一有毀傷。便名不孝。釋教主乎治心。心爲萬物之主。身乃四大假合。以之供佛。則破執滅罪。保此偷安。則虛生浪死。此儒釋立教之所以差別也。小乘律中。然指犯吉羅。大乘明若不燒身臂指供養諸佛。非出家菩薩。蓋小乘但期自利。故須奉法全身。大

乘貴在利人。是以忘身爲法。此大小開遮所以差別也。南山律師依大乘宗。深加讚歎。義淨三藏據小乘宗。橫生貶斥。至若荆溪永明慈雲法智。或辯論闡揚。或躬行履踐。後學取信。良無惑焉。唯近世雲栖大師。獨不許可。蓋恐末流狂妄。易流邪僻。故爲權說以救之。一抑一揚。各有所以。此諸師宗趣所以差別也。法華明一切衆生喜見菩薩。頓捨一身。復燒兩臂。發誓願竟。兩臂還復。此得忍大士之現果也。梵網明新學菩薩。千里遠來。師應如法開示苦行。若不燒身臂指。供養諸佛。非出家菩薩。此初心受戒之遠因也。此聖凡因果之所以差別也。今人果能內發大心。外緣三

寶期心破障。刻志菩提。則罪滅福生。功無浪費。如其內負
我人。外貪名利。以之鼓惑庸愚。招致供養。則有過無功。不
可不慎。人固有事同而心異者。不可不察也。此心行是非
所以差別也。客曰。如此差別。可得融通否。曰。可。夫由外以
知內。則外爲內助。因邪而入正。則邪爲正緣。經云。外道所
說。皆是佛語。是以徧行勝熱。爲善財師。調達善星。皆如來
伴。如此邪正融通。奚不可之有。儒釋兩教。觀其跡則異。論
其理則同。是以泰伯斷髮。孔子稱其至德。比干剖心。魯論
美其爲仁。則儒釋未始不同也。大小三乘。均佛所說。隨機
不同。或開或制。然小從大出。權自實開。非實則權何所開。

無大則小不自立。理無二致。正不待融通也。宗趣不同。自是人師異見。何關理教。差殊也。如二人見月。一東一西。各隨人去。月無二向。見有東西耳。聖凡雖有差別。然因該果。海果徹因原。因果本自融通。亦何差別之可論哉。至於心正則事正。心邪則法邪。邪正在心。非由事相。然翻掌覆掌。初無異手。得念失念。豈有二心。正不必融通也。如上所陳。同異不可偏執。苟執其異。則適起爭端。苟執其同。則漫無分別。然則如之何則可。必也知同異皆由一心。一心本非同異。雖非同異。同異宛然。夫是之謂正解。願吾子究心焉。客曰。快哉論也。聞所未聞。然尙有餘疑。望爲解釋。吾聞燒

身臂指。乃得忍。大士所爲。非初心境界。則如之何。答曰。梵網所明行法。本爲初心。故經中但云新學菩薩。不云得忍。蓋新學大士。誓願未堅。心志未廣。故藉師長爲開道。苦行爲鞭策。以成受戒。增上緣因耳。若必期之得忍。大士則出家受戒者鮮矣。今人受戒。莫不然香供佛。蓋本諸梵網。以然香。然指同一苦行。第小大不同耳。若初心不許然指。則亦不許然香。不許受戒矣。有是理乎。客曰。如上所論。謹聞命矣。未審出家之士。宜何所先爲當。必燒爲復可緩。設使不燒。是犯戒否。答曰。出家之士。宜先明理觀。後及事行。則趣向有方。功無虛棄。若理觀不明。但行苦行。欲冀功勳。終

無實益。燒與不燒。各隨人意。經雖勸人。亦不結罪。但不可故違佛語。自生異見。致使妨礙行門。阻人勝善。初心之士。又不可不知也。客於是再拜而退。

念佛著魔辯

或問省庵曰。參禪一門。全仗己力。故每多魔事。念佛則仗他力。故承佛護念。魔事不生。有諸否乎。省庵曰。唯唯。否否。夫參禪念佛。論其難易。固有自力他力之分。若論魔事。一俱不免。或者曰。敢問何謂也。曰。魔事之來。其由有三。一者教理未明。二者不遇善友。三者自不覺察。今夫人適千里之路。苟不按輿圖。又不逢引導。復不識前路通塞。莽莽然

而進。吾知其難免於錯誤之患矣。參禪念佛譬如行路。經教如輿圖。善友如引導。覺察之心如識路通塞。雖兩條塗路。夷險不同。俱不免錯誤之患。參禪且置。只如念佛。或有厭平坦而好奇特者。或有捨直截而求紆曲者。或兩路兼行。兩路俱失者。或以塗中爲家舍。平地爲高山者。如是錯誤。不可勝舉。皆教理未明之過也。念佛一門。極圓極頓。至易至難。只如彌陀經中。一心不亂四字。淺言之。愚夫愚婦皆可爲。深言之。大聖大賢終不能過。今初心行人。或暫得輕安。自謂已得事一心者。初開淺解。復自謂得理一心者。或粗念不生。細念猶生者。或勇猛過分。精進倍常。不知心

外無佛。速求取證。不達善巧方便。急欲捨身。魔鬼因之。遂入其體。爲風爲狂。都不覺知。此善友不遇之過也。夫衆生生死。以我見爲本。我見不除。修行無益。然我見之生。根深蒂固。其萌芽發幹。無處不有。是故見地高。則我見俱高。工夫進。則我見亦進。若不時時檢點。刻刻提撕。則念念發生。心心增長。隨逐行人。雖死不離。是故學人心不虛。則自不覺察。不覺察。故我見增長。少有所得。則生憍慢。譏嫌同學。誹謗行人。雖有修行。終成魔事。此自不覺察之過也。或曰。參禪須近明師。若無明師。須看經教。念佛祇貴深信力行。既能深信力行。則決定往生。何藉善友經教。省庵曰。是何

言歟。世間小技。尙不可無師。况念佛爲出生死要門。若無善友經教。從何開發。誰爲引導。觀經下三品。皆是臨終善友開發。故得往生。其上中品。則不必言矣。須知從凡至聖。由易至難。莫不以善友經教爲根本。汝不因經教。何由而知淨土法門而生信向邪。或曰。若因經教而知念佛。則彌陀一經足矣。奚以多爲。曰。上根則可。中下根人。須徧閱淨土諸書。備識信行願三差別之相。加之善友警策。內以虛心覺照。庶幾免於魔事。而後念佛之功。可日進焉。否則不爲魔事。終成增上慢人。一念不覺。遂成淪墜。其禍可勝言哉。或曰。行人心旣念佛。佛豈不垂護念。如其護念。魔事何

從省庵曰。念佛人果得一心不亂。則佛護念不虛。如其未得一心。或有以輕安爲禪定。淺解爲深悟者。隨有所得。生增上慢。此則自取過愆。非如來答。是故吾言善友經教。覺察之心。三者缺一不可。而覺察之心。尤爲最要。不可須臾暫離。若一念不覺。則一念顛倒。念念不覺。則念念顛倒。顛倒既起。魔事興焉。畢世工夫。一朝唐喪。可不畏歟。淨土文云。身無病苦。心不顛倒。當知身無病苦。則求在於佛。心不顛倒。則求在於我。在於佛者。非我敢必。在於我者。安可不自勉焉。設使臨終一念顛倒。非唯九品不生。抑亦三塗難免。佛雖大慈。救我不得。奈何奈何。是故修淨業人。不可一

念遠離善友亦不可一念生顛倒心也。

梅芳法師往生傳

師諱明宏。杭州人。幼年父母爲納婦。逃之出門。其母哭之失明。父母亡。出家剃髮於紹興河橋之彌陀庵。尋事參訪。習天台教觀。坐禪苦行。頗有省發。後閱藏於天台萬年寺。晝夜翻閱。久之。兩目俱盲。乃曰。此吾害親之報也。自是一心念佛。寒暑無閒。嘗語人曰。我因失明。得大利益。居無常處。囊無長物。所得餽施。隨施貧乏。講經不用註疏。縱口任心。詼諧間出。得意者善之。歲丁未九月。余於梵天寺起念佛七。師適寓廣嚴庵。因招之入社。時師患病日數十徧然。

念佛未嘗少懈。七期畢。師往無錫齋僧館。病轉劇。忽一日。徧告檀越。期以明日將行。衆如期而至。師卽起坐念佛。合掌而逝。

讚曰。師與余知交最久。余嘗斷師必生西方。何以知之。蓋師具三真。謂真解脫。真乾淨。真精進故也。然雖言之。尚未有驗。丁未冬。一元師從吳地來。述其坐化之事。因喜曰。余言驗矣。

聖眼上人往生傳

師諱明德。海寧人。俗姓馬。四歲出家。梵天寺。十六剃髮。自幼性情孤僻。不好世務。唯讀書吟詠。所居一室。蕭然無長

物年三十六。將往律堂求戒。忽得喘疾。遂不起。有徒孫一
輩。延余及數友在寺結社。開淨業堂。堂之左卽師臥室。日
聞鍾魚念佛之聲。恒默隨之。逮病篤。自知時至。乃命徒孫
延衆師至牀前。高聲念佛。少頃。命止之。向余曰。願師爲我
開示。余告曰。汝當盡捨萬緣。一心念佛。萬劫死生。只今脫
去。急宜著力。師遂同衆念佛。復發四宏誓願。語極懇切。至
夜分。佛聲方畢。纔舉觀音聖號。卽轉身張目而逝。時雍正
七年臘月二十六日也。讚曰。昔東坡臨終。徑山禪師告曰。
端明莫忘西方。坡曰。西方不無。但箇裏用力不得。今師乃
能用力如此。可不謂難乎。人皆謂師年方強壯。有志未遂。

而死莫不惜之。豈知一生淨土。無志不遂。無願不獲。非唯不應惜。寔所當賀。嗚呼賢矣哉。

念佛規約

并引

夫生死海深。非念佛莫能濟度。菩提路遠。非淨土孰可依憑。然苟非精進念佛。無自成功。未得一心淨土。何由可到。今則三七爲期。六時無閒。四方善友俱集。一時勝會宏開。第恐懈怠易生。精勤難致。若無約束。何以策我身心。不有規模。何以生他敬信。謹酌事竅。略陳條列如左。

一 五更聞鐘聲。一齋下單。洗面後齊集大殿念佛。無得晏

臥不起。避懶偷安。

一明相既出。卽用粥。粥後嚼楊枝畢。卽入堂持佛名。候一寸香過。起身經行。打大木魚。至香餘一寸。卽歸位坐。默然而止。少頃用茶畢。打小魚子兩下。方可起身抽解。

一粥後三枝香。用小食。四枝香。用午飯。尅定時候。不宜錯誤。一坐香過一寸。一人起身行旛巡香。少頃鳴魚引磬。二人亦起身巡香。有昏沈者。卽持旛與之。令其行香執旛。遣睡。如是展轉。遞相警策。至香餘一寸。魚磬二人先歸本位。次行旛者。至佛前問訊收旛。然後各歸本位。

一佐食菜蔬。以四菜一湯爲準。

一午飯後六枝香。用晚粥。明相既沒。念佛六枝香。俟第六枝香將半。卽向上長跪。稱觀音勢至。清淨海衆。各滿百聲。誦小淨土文。禮佛十二拜。歸單養息。餘日例此。至第七夜。誦西方發願文。禮佛四十八拜。餘日二七亦例此。

一臨睡入觀。稱佛千聲。卽默念佛名而卧。

一經行跌坐時。睡眠時。及大小便利時。不宜雜話。

一坐香。過二寸香。不歸堂者。卽移蒲團。在佛前。跪香一枝。

一昏沈時。行旛至。不起身者。跪香一枝。

一不得出外閒游。歸寮養息。及交頭接耳。雜話戲笑。有犯者。跪香一枝。

一會中有老病者。自應方便隨順。不拘常例。或隨喜念佛。暫來卽去者。亦不在此例。

一設有病緣。當告假。不得隨意自便。

一衆中或有去就乖角。語言相爭。攪羣亂衆者。卽移單出堂。一每一七完。養息半日。或靜坐。或睡眠。俱默念佛名。切忌閒游雜話。

一每日巡照師各寮巡察放逸。每夜擊板念佛。以警策睡眠。

以上條約。有犯者。悅衆師應舉舉而不服者。罰。知而不舉者。同罰。跪香一枝。

淨業堂規約 并引

夫生死海深。非念佛疇能濟度。菩提路遠。非淨土孰可依憑。然苟非精進。三昧無以成功。未得一心。九品安能自致。今以三年爲限。數子同居。但專持乎六字洪名。唯致力乎一心不亂。第恐時長行久。懈怠易生。實喪名存。劬勞徒設。不加鞭策。無以約束身心。必有條章。方能齊一彼此。幸相規而相勸。無爭我以爭人。俾淨業速成。華臺早就。見彌陀於現在。證三昧於此生。誠如是。則所願不虛矣。謹立規約如左。

一 每日課程。十時念佛。九時作觀。一時禮懺。雖大寒大熱。

無得暫虧。

一黑白半月誦菩薩戒本。朔望日誦梵網經經畢。長跪誦發願文回向。

一凡遇佛降生日。成道日。涅槃日。及僧自恣日。俱宜設供獻佛。隨力爲之。

一每年新正起念佛七。祝延聖壽。臘月起七。以濟年終。被殺衆生。

一每夜黃昏候。到大殿施食。持變食真言四十九遍。念佛千聲。以濟鬼神。

一每日念佛受齋。俱搭衣。朔望日午飯應持鉢。非時食戒。

佛制最嚴宜並持之。

一宜禁止遊行不得出寺觀望入城閒走除爲父母師長看病因緣或可暫時告假餘俱不可。

一告假須尅定日期若過期還者罰跪香或托事延緩久假不歸者各宜自便。

一宜謝絕迎送尊客相看略敘道話數語寸香之外念佛而已若有問法因緣不在此例。

一宜屏棄雜務凡經書筆墨詩偈文字一切置之高閣不應重理。

一不得應酬人間佛事縱施主到山諷誦經唄不宜輒詬

設不得已。祇可禮彌陀懺。念佛而已。

一堂中除念佛外。一切不應雜話。縱有要事問答。亦宜低聲。一念佛昏沈時。用小旛一首巡香。互相警策。

一昏沈時。行旛至不起身者。罰香。有過不懺悔。屢諫不止者。罰香。動氣發粗。彼此鬪爭者。同罰。一人忍。一人嗔。嗔者罰香。一凡有過。宜互相規諫。設有違諍。卽應懺悔。不得隔日。隔夜。隔時。

一無故闖寮聚談雜話者。罰香。非要事止靜不歸堂者。罰香。一朝暮課畢。回堂。維那合掌厲聲。念呵責銘。以誠策我。我當長跪佛前。合掌承受。

省庵法師語錄卷上終

省庵法師語錄卷下

淨業學人彭際清重訂

勸修淨土詩

實賢謏劣庸僧。禰卑陋器。本無大力。仰承前輩宗風。時
有好懷。獨結西方淨願。雖躬行不逮。原無實得於自心。
而兼濟未忘。乃有愚衷於此世。原夫淨土一門。理極頓
圓。事誠簡易。在因強而得果疾。用力少而成功多。淺之
則夫婦與知。深之則聖賢莫測。三根普被。萬類均收。撈
漉苦海之魚。信爲巨網。挽回末法之證。的是竒方。離斯
捷徑。出生死以奚從。捨此法門。脫輪回而何日。但今時

泛念者多。深信者少。或有訶爲著相。貶作小乘。並由不讀教文。祇是任憑胸臆。豈知中天調御。開金色口。以丁寧。十方如來。出廣長舌。而讚歎。文殊普賢。尙有求生之偈。馬鳴龍樹。亦有願往之文。至於智者永明之輩。中峯天如之流。並是教祖禪宗。莫不垂文著論。闡明至理。深勸後人。奈何末代凡夫。鈍根淺識。乃欲遠勝古人。置之弗屑邪。實賢因此感慨。嘗欲發揮論議。解釋疑情。於乙未秋。著詩三十首。一時草草付工刊刻。惜乎理未周圓。事多疏漏。每欲從事添削。不遑下手。戊戌夏。依紹曇老人於隆興精舍。學律安居。聽經坐臘。自茲旣竟。同學攝

兄踊躍讚歎。憊憊卒業。由是芟其繁蕪。補其闕略。理隨事廣。語逐文多。不覺信筆任心。盈編成冊。於中鋪陳。依正。描寫莊嚴。廣破羣疑。深彰一理。指是工夫。以知操守。分張品類。以勸修行。于是總陳三教。別派衆流。所謂仕隱工商。漁樵耕讀。乃至苦樂閒忙之輩。生老病死之人。莫不皆導以念佛。示其往生。凡一日二六時中。每年十二月內。無時非念佛之時。無月不思歸之月。所以一其念。專其志也。夫信是道原。故首標依正。以起信。疑爲信障。故次釋人情。以破疑。疑障旣除。信心堪發。信心旣發。正行斯遵。故授之以工夫。途路非徒自善。尤宜利他。語

貴隨機事須逗巧。故分之以品第人倫。然有行無願終不往生。有念無觀亦難見佛。故受之以恒時運想。頻月致懷。末則總歎娑婆之苦。同歸淨土之樂。伸明信願。結勸往生。蓋淨土法門。不出信行願三。故爲次第如此。詩成。新舊共得一百八首。雖非法海之全珠。亦是義山之片石。文誠粗疏。語頗切實。伏乞觀者知我苦心。鑒茲不逮。略其詞而察其意。行其事以踐其途。庶幾同脫苦輪。盡超樂土。幸勿因人廢言。徇名棄實。是所至望。

我教原開無量門。就中念佛最爲尊。都融妄念歸真念。總攝諸根在一根。不用三祇修福慧。但將六字出乾坤。如來

金口無虛語。歷歷明文尙具存。

一入西方境自融。雙眸頓覺昏銷鋒。無邊刹土光中現。徧界真身象外逢。華襯玉欄紅隱隱。樹含金殿碧重重。色空泯合渾無寄。鏡像分明絕點蹤。

境勝由來道易修。多生習氣一朝休。盤中甘露珠圓轉。樹上摩尼水倒流。碧玉蓮臺承足穩。真金華瓣襯身柔。三車已息馳求念。露地安然坐白牛。

瑠璃地上絕塵埃。晏坐經行亦快哉。錦綉織成行樹葉。丹青畫出衆樓臺。漫空華雨諸天下。徧界香雲大士來。何處忽生新佛子。芙蓉又見一枝開。

土淨能令心自空。無邊妙色現其中。千燈互照身光映。十鏡交輝佛土融。珠網重重懸寶樹。天童歷歷在華宮。龜齡鶴算渾閒事。直得虛空壽量同。

稱性莊嚴非外得。天然果報自無窮。一塵徧入諸塵裏。萬法全收一法中。華映玉池人倒影。身遊佛國地俱空。色心依正原無礙。但得情忘境自融。

瓊枝瑤草色長新。別有乾坤世外春。紅藕華藏金砌鴨。綠珠簾映玉樓人。塵沙莫計聲聞輩。海水難量大士倫。博地亦能容入會。何時得與聖賢親。

寂靜身心自偶諧。尋常歷覽與無涯。金幢倒映瑤璃地。玉

砌平舖瑪瑙階。自有好華堪供佛。更無塵事可干懷。何時
得遂平生志。坐對鴛鴦水上排。

我佛慈悲相好身。隨機應現不同倫。盡虛空界元同體。極
一微塵總是真。疊疊髻螺山頂綠。彎彎眉相月鈞新。七重
樹下金蓮上。處處追陪二大人。

相好凡夫皆具足。六通無礙異常倫。直將果用爲吾用。不

改凡夫作佛身。

淨土一生成佛更無中陰入胎之事
唯除願力欲往他方世界度衆生者

周顛

十方同指掌。徧遊諸國似比隣。回觀此土修行者。龕龕生
涯太苦人。

彼方殊勝事無窮。依正由來總不同。刻盡青山鋪碧玉。收

乾滄海出虛空。法音自演風柯裏。妙義頻宣水鳥中。諸佛
衆生同一體。互相周徧盡圓融。

淨土因何獨指西。要令心念有歸栖。一門入後門門入。初
步迷時步步迷。直就下凡階上聖。不離煩惱證菩提。蓮華
勝友應相待。何日歸來手共攜。

如來本願非虛誑。稱我名皆到此中。大彌陀經云。設我得

樂欲生我國。乃至十念。若不生者。不取正覺。莫患棘牆三無客住。只愁枷鎖貪

幾時空。或曰。若世間人皆往西方。則此方誰住。故以此喻曉之。百川歸海。水寧溢。萬

國朝王地豈窮。或曰。若世間人皆往生。則衆生甚多。彼國如何容受。故以此釋之。易往無

人真可惜。不知何事戀樊籠。

會。

人言肅殺是西方。死後身空墮渺茫。有人云西方是肅殺之氣人死歸空生氣

殄滅卽是西方豈身毒應無生博望身毒應無生博望。身毒卽天竺國漢博望侯張騫曾至其地

岐山那有活文王。岐山在西夷文王所生之地衆諸侯各朝天子。問何故極

樂在。西答極樂非定在西但對東言西譬如天子所都名日長安諸侯朝天子四方來者不一東方來者則日長安

在西西方來者則日長安在東長安定有東方乎彌陀所都名爲極樂十方菩薩皆願往生東方生者卽言極樂在

西西方生者卽言極樂四大洲殊觀日光四大洲謂東勝

任東極樂定有東西乎身洲南瞻部洲西牛賀洲北俱盧洲殊觀者日月環遶須彌山照四大洲

東洲日没南洲日中西洲日出北洲半夜四洲人並指日出處爲東日没處爲西則南洲西方卽是西洲但得往生

之南北洲之東東洲之北矣方位寧有定乎休恐怖應知壽命實難量大彌陀經云我剎中人壽命皆無央數劫

都言念佛是愚夫。得作愚夫亦已。夫龍樹辯才還拙否。

龍樹

菩薩造毘婆沙論發願往生

文殊智慧是虛無。

文殊菩薩往生偈云願我命終時盡除諸障礙

面見阿彌陀往生安樂國

主人底事憑居易。

東坡詩云樂天不是蓬萊客憑仗西方作主人

公據何人問大蘇。

東坡南行唯帶阿彌陀佛一軸日此軼西方公據也

寄語聰明宜

念佛。閻君應不愛之乎。

六字真經堪讀誦。誰言名字假非因。

有人言名字屬假非成佛因豈有念假名

而成真佛

卽名顯體方稱妙。託境觀心易入真。

六字洪名爲境四性叵得爲觀

螺贏祝兒終肖父。

螺贏銜桑蟲于穴中呼祝七日則還肖其父衆生念彌陀于心內持名一世安

得不。蛞蝓丸糞亦遺塵。勸君早發西歸願。臭穢何容戀此

身。

娑婆魔外事縱橫寂滅無如安養城苦樂雙忘名極樂或謂

求生西方是自貪快樂非爲了道不知言極樂者苦樂兩忘方名極樂若對苦說樂是人天之樂不名爲極

生俱盡說無生問既說往生卽有生死云何言無生答謂達生體本空故生卽無生又接引初機權

說往生生已親佛無彼此皆同體又問何不念釋迦而反證始知無生念彌陀不念十方諸佛

而念一佛答念彌陀卽是念釋迦念一佛卽念十方諸佛以佛佛道同故順本師教故心得專一故又彌陀與此土衆生偏有因緣故地有東西是假名何事勸人生彼國只緣此土

道難成

若執往生爲妄想或謂念佛是攝妄想一法豈言住此便

成真若言生西方是妄想則東西不著尤非理若言我今住著娑婆妄想尤甚

亦不住此二俱不著隨意受生此尤非理何者既非法身大士又非應化聖人欲愛未除業緣未斷若不生西方定

生此土既生此土則仍在輪回業力所牽三途有分安能隨意受生邪淨穢雙忘亦是塵此

爭穢雙忘一念亦是情計尙屬法塵所攝若真雙忘則何礙求生生本無生生四土見猶

離見見三身須知真妄原同體迷悟由來總在人

纔勸往生言著相儘思貪戀卻迷蒙無生畢竟有生在有

斷見者言死後永滅都無生處不知業牽識走離相依然

畢竟復入胞胎除卻念佛往生更無有脫離處離相依然

住相中若言死彼永滅不求往生名不著相是則念與佛

融方是即荆溪云體不二故方名爲即近世聰明之士皆

心木來一體但執念心不信言即心即佛及勸念佛便言著相不知念佛念

撥事求理名惡取空近世聰明之士亦知心淨土淨語以名爲真空

淨土則心與土割而爲會須心佛雙忘後日照山川處處不信

二此惡取空非真空也

通。

都言淨土唯心是。十萬餘程是外求。但執妄心居在內。若

十萬億佛國之西方是外求者。則認方寸妄心居在內。便同阿難所計七處之一。不知真性體全收。

楞嚴經云。當知虛空生汝心內。猶如片雲點太清裏。况諸世界在虛空邪。彌陀諸佛鏡中影。極

樂娑婆水上漚。取捨厭欣無罣礙。自家屋裏任優游。欣自

淨故取厭自心之穢。故捨一取一。捨不礙唯心。何外之有。

盡說厭欣為障道。誰知淨業善資成。厭離未切終難去。欣

愛非深豈易生。何處安居能徙宅。誰人無事肯登程。鐵圍

山外蓮華國。掣斷情韉始放行。

人疑念佛恐成魔。魔佛相爭不較多。了境唯心無罣礙。但

佛從心現外境本
空則雖魔即佛
將心取境便淆訛。不知境自心生取著為有則雖佛即魔

國君憤憤民方擾。室主惺惺盜敢過。一念取著則魔得其便妄心不起則鬼不

奈何須信佛心常護念。彌陀經云念佛之人一切諸佛之所護念波旬束手更誰

何。都言處處是西方。平地高山總不妨。古云高山平地總西方此是真實到家之

語若未到家便成戲論入廁豈宜還塞鼻。衝泥何事尙褰裳。塞鼻褰裳即是

穢相未空處處西方豈非妄想病來那得心無苦。夢裏寧知身在牀。莫話

空言違實行。好憑落日望還鄉。

盡說西方是小乘。小乘原自不相應。法華經信解品迦葉等四大弟子白佛言

但念空無相無作於菩薩法游戲神通淨佛國土成就象生心不喜樂故知淨土法門是菩薩所行非小乘事蓋如

寫卷去而吾家

卷下

來在小乘教中不說有他方佛土唯大乘方等經中廣談
十方佛國而諱諱唯指歸西方淨土一門故西域稟小乘
教者都不信有彌陀佛國往生之事學大乘者多修此法
今人反謂淨土是小乘法大乘所不為豈不大顛倒邪

須知念佛還成佛雲栖云念佛成佛是親種子故大勝為

僧又作僧大智律師云近見禪講宗師有發願來生童真
出家者嘗談語言汝今已得男子出家合求出

離何乃復求男子再願出家畧無勝進乎白社遠公咸願往晉慧遠法師於廬
山集眾念佛刻木

為蓮具十二葉引流泉入池每度一時水激一聲晝夜六時禪誦不輟與會諸賢往生甚眾華嚴大士

亦求登華嚴行願品普賢菩薩偈云願我臨欲命終時盡
除一切諸障礙面見彼佛阿彌陀即得往生安樂

國攀龍附鳳知何限底事吾儕不願升

餘教修行岐路曲此門直入坦途平三祇行遠終難就十

念功成便往生藏教修行要經三祇百劫方成佛道圓教
念佛但憑十念一念便得往生此則教門

頓漸不同。自他功力有異。蓋餘法修行多憑自力。念佛一門兼藉他力。他力易就。故十念即生。自力難成。故三祇尚滯。有謂西方極樂非一生可到。須經多世展轉。修行方得往生。此不知教門殊勝。佛力難思也。大石載舟。還不沒。那先經云。如持百枚大石置於船上。因船力故。石力不沒。喻不墮三途無船。喻無佛力。小石喻輕罪。蒼蠅附驥。始堪行。揚帆順水。因風便。何憚迢迢十萬程。

休言極樂苦難生。纔說難生是障門。

障門有三。一疑業力深重。二疑福力輕微。

三疑修行日淺。有此三疑。不得往生。

佛力自能除業力。信根端可拔疑根。須信

彌陀願力深重。尚不棄五逆十惡。何況善人。尚收功於十念。一念況復多念。

深逃私債。藏王府。

一入西方。宛業不能違害。

現受官刑。遇聖恩。

親蒙佛力。真早晚相從。裏府不得勾牽。

糧去。此生終不負慈尊。

莫執壇經排淨土。壇經云東方人造罪念佛求生西方西

修善不言無淨土亦非謂西方實有造罪之人當以意逆志不可以辭害意 祖機佛語並團醜

因言薦理彰吾教得意忘言顯本宗十善齊修寧造罪羣

賢共會豈還蒙他方此土何來去法界明明在眼中。

念佛若言真漱口。趙州云念佛一聲漱口三日今 誦經應

不用開脣藥能醫病還成病。火本温身反炙身。天台云般

聚四邊不可觸觸則被燒不觸則温身熟食古人佛見未

生除甚麼。趙州云佛之一字吾不喜聞古人真實證到這

未除惡見何況善見尙未起三乘見何凡情尙在斷何因

勸君莫漫閒言語。只要今生出苦輪。

念佛圓通攝六根耳根誰謂獨超倫。人知楞嚴圓通耳根殊勝不知念佛即攝

耳音聞既是圓常體。名字元非生滅因。問曰經言諸行是無常念性元生滅

念性尙是生滅况名字邪答曰經文為順此方之機於諸門揀擇一門令初心入道故有抑揚之論實則二十五聖

法門皆具圓通常義故曰聖性無不通順逆皆方便言無不通則知無不圓常也豈名字獨成生滅邪又問聖性雖

無不通初心入道豈無遲速優劣答別論雖爾通論不然念佛既攝耳根則同是一門何分優劣又念佛主於意根

徧攝五根耳根唯屬於耳不兼餘根耳根從一門深入念佛則根根可入當知耳根不攝念佛能攝耳根故此

一門三根善被以念念名名固切將聞聞佛佛還親由來二聖皆

昆仲同作彌陀輔弼臣。

不信西方不願生都由執計未能清持冰喚水須融水。或謂

即心是佛何須更見彌陀今釋曰言即心是佛者如持冰喚水冰雖是水結滯未融須假太陽方能和解心雖是佛

全體在迷須假佛日方能開悟
豈可固執迷心而不願見佛乎
指木為楹豈是楹或謂即

何以更生淨土今釋日言即心淨土者如指木為楹木雖
可以為楹而不即是楹心雖能造淨土而非即是淨土今

試自問十二時中於一切境緣上過起一毫雜念染汚心
否若有一毫雜念染汚即是穢相未空云何言即心淨土

如是之言皆為自欺故知若不往生唯心淨土終不得顯
已佛還從他佛顯正因須藉

了因明殷勤苦口緣何事只為娑婆是火坑。

悟後莫言休見佛應知悟後正求生。天如云汝若悟心則淨土往生萬牛不能

矣挽童蒙未可離師學稚子猶宜傍母行詰老後身休更蹈

宋詰老住京師大刹四十年不離坐禪精苦坐化後青公
紙襖亦燒出舍利後生大富貴處一生多受憂苦

覆轍豈堪成宋青草堂後會須親證無生後回入娑婆度

有情。

借問往生何計策。須憑信行願俱全。信根先向心田種。行

足還加願力堅。路乏資糧終不到。

有信願無行

馬無韁御孰能

前。

有信行無願

但將三事爲符契。攜手同登九品蓮。

念佛休嫌妄想多。試觀妄想起於何。無心收攝固成病。著意遣除亦是魔。救火抱薪添烈焰。開隄引水作長河。直須字字分明念。念極情忘有甚麼。

佛聲易可除昏散。出口還收入耳來。鷲地亂茅隨火盡。蔽天濃霧逐風開。通身是佛誰爲念。遍界生蓮不用栽。何待臨終生極樂。卽今端坐玉樓臺。

彌陀四字絕商量。只貴專持不暫忘。若厭平常終隔斷。纒

求玄妙便乖張。粗嘗橄欖寧知味。細嚼鹽齏始見香。念到身心空寂處。不勞開口問西方。

念彌陀佛貴專精。念到功深念自純。念念圓明真性體。聲喚醒本來人。嬰兒墮水頻呼母。蕩子還家始見親。卻話從前離別事。翻令嗚咽淚沾巾。

欲得工夫無間斷。直須精進始相應。暫時失念雲霾日。瞥爾生心蛾掩燈。小水長流終貫石。沸湯停火亦成冰。往生作佛渾閒事。只在當人念力能。

念佛欲知端的處。箇中殊不計功程。塵消古鏡光逾遠。風定寒潭水自平。四性本空心歷歷。三身叵得佛明明。一門

具足諸方便。止觀匪從漸次成。

行時正好念彌陀。一步還隨一佛過。足下時時遊淨土。心頭念念絕娑婆。傍華隨柳須回顧。臨水登山莫放他。等得阿儂生極樂。十方來去任如何。

住時念佛好觀身。四大之中那一真。我與彌陀非兩箇。影兼明月恰三人。空房漸朽應難住。腐棟將頽豈易蹲。何日如蟬新脫殼。蓮華胎裏獨栖神。

坐時觀佛足跣趺。身在蓮臺華正敷。毫相分明隨念見。金容映現與心符。事如夢幻元空寂。理到圓融非有無。何日池頭捧雙足。親蒙頂上灌醍醐。

臥時念佛莫開聲。鼻息之中好繫名。一枕清風秋萬里。半床明月夜三更。更無塵累心難斷。唯有蓮華夢易成。睡眼朦朧諸佛現。覺來追記尙分明。

僧宜念佛痛加鞭。得預蓮池清淨緣。親聽法非徒對本。頓明心不用參禪。明師豈若彌陀好。善友誰居補處前。一念徧遊諸佛國。笑他行腳困山川。僧

此方正教在儒宗。但盡今形後世空。仁義躬行雖切實。死生纔話却朦朧。好尋歸路思安養。莫認郵亭作故宮。淨土原從忠孝得。金臺上品奏元功。儒

道家搬運爲延齡。用力偏多功少成。要識神僊非不死。標

經云復有從人不依正覺修三摩地別修妄念存想固形遊于山林人不及處有十種僊壽千萬歲斯亦輪回妄想流轉報盡還須知淨土始長生。後魏曇鸞法師初受陶隱來復入諸趣君僊經十卷專事修鍊後遇菩提流支問曰佛道有長生乎支曰長生不死我佛道也遂以十六觀經與之曰學此則三界無復生六道無復往其為壽不可窮也驚於是遂焚僊經而專修觀經持金作釧終無變弄泡成珠但有名或問我學僊則現世便得長生汝念佛則現身便死長生何在答曰汝執幻身為堅固如弄泡成珠有名無實我知心性為真常如持金作釧終無變易又神僊壽命千年易盡如弄泡成珠西方壽命劫石難量如持金作釧寄語學僊宜念佛蓮池端的勝蓬瀛道

求官常恨做官卑。官愈高時勢愈危。太璞不完慚美玉。泥塗曳尾羨靈龜。已知仕宦空無味。試看彌陀念是誰。案牘雖忙姑少置。朝朝十念不宜虧。十念者每日清晨面西正立合掌連聲稱阿彌陀佛

盡一氣爲一念。如是十氣名爲十念。盡此△仕
一生不得一日。曹廢若能如是。決定往生。

處士逃名遠市闌。此身清隱翠微閒。平分嶺上半邊月。高
枕床頭一片山。白屋安貧終暫計。夕陽歸路豈知還。蓮華
佛國深深處。出世芳踪不可攀。隱

百工居肆易成功。業有專門各不同。旋轉化工歸手內。挽
回造物在胸中。從來命不由人做。只有心堪自己攻。隨分
妻孥且安樂。團團頭念佛叢叢。工

商客經年道路行。舟車迅速每兼程。利深不覺風濤險。物
重翻將性命輕。長恨貨多難長價。寧知身死不重生。勸君
念佛歸西去。利比娑婆萬倍贏。商

漁人活計在扁舟。南北東西任去留。劈破月華沈棹底。移
來山色上船頭。常教妻子張羅網。誰識閻翁下釣鈎。苦海
無邊休陷溺。早憑佛力懺深尤。漁

樵夫家住碧山垠。斤斧聲中倒亂薪。斫斷雲根穿地脉。鑿
開石齒露峰唇。但看舊冢埋枯骨。不見新墳起死人。及早
回頭尋出路。蓮華胎裏好藏身。樵

農人念佛好殷勤。旋種新秧手自分。片笠衝開楊柳雨。一
犁畊破杏華雲。曲肱飽飯欣秋熟。回首思鄉望夕曛。一片
瑤璃田地美。天然殊不用畊耘。耕

世閒萬事總浮塵。只有詩書差可人。千卷西窗殘月夜。數

編東閣亂山春。吟聲未若佛聲好。書味何如道味真。識得

自心清淨土。文章糟粕不堪陳。讀

一等世人修福業。希圖來世作公卿。假饒位極五侯貴。何

似身居下品生。施水但滋貪種子。因貪富貴而行布施善芽翻長業

根莖。因布施而招富貴。因富貴而造業。因造業而復墮三途。願回有漏成無漏。以此福業

回向西方。早注華閻第一名。此方念佛。西方七寶池中。即成無漏。生蓮華一朶。標名其上。身後

託生其中。△福一心差處路歧逢。自造經書立本宗。即今五部六册之類

皆偷竊佛經。禪以鄙語以成己典。兩扇門邊傳秘訣。三家邨裏聚羣蒙。樂

邦有路元平直。佛法無私本至公。奉勸回頭歸正教。彌陀

念念見真空。外道

尼師念佛好隨緣。莫向深閨處處穿。自守清貧爲服藥。休
營痴福更招愆。古人云有爲之功多諸過。告天堂未就地獄先成。情根斷似枯絲
藕。戒體芬如出水蓮。他日神栖安養國。七珍池上禮金僊。

尼師

貧人念佛莫躊躇。寒餓腸中愛易除。鼈脚日斜烟未起。屋
頭霜落被還虛。深知此界爲囚檻。極厭殘骸是潰疽。無限
天衣諸化食。他年極樂任安居。貧

家道休誇堪敵國。從來貴德賤金銅。無雙富莫如原憲。第
一貧唯是石崇。徒有千箱遺子息。難將一物見間翁。何如
念佛生安養。自性財原用不窮。富

貴人雖貴未爲欣。死後還他一個墳。王謝園亭空燕子。五
侯門戶但寒雲。身登上品方爲貴。心悟真如始立勳。卻到
蓮池更回首。世間螻蟻盡紛紛。貴

宿業今招下賤身。從來眉眼未曾伸。頻年辛苦恒隨主。畢
世勤勞敢怨人。好向己躬勤念佛。偏宜淨土獨栖神。他時
得預蓮池會。入聖超凡貴絕倫。賤

智人業識每彎環。好把從前念盡刪。六個字中無計較。一
聲佛外絕機關。物情料破寧知死。世事多能只欠閒。畢竟
往生爲上策。早尋歸路自知還。智

慧業文人道易成。休誇才思負聰明。數篇未足充飢餓。半

字何曾敵死生。綺語化爲真實語。吟聲翻作苦空聲。樂邦大有佳章在。水鳥風枝盡會賡。慧

愚夫造罪恣貪墮。肯信從來果與因。祇道現生無後世。可

知今日有明晨。或問曰明晨可見後世何人能見答曰天眼能見汝既無天眼又不信佛語是以不

見後世又問天眼能見其相云何答曰如見人從一房出復入一房死此生彼亦復如是新移宅舍猶

迷向纔換衣裳不識人。生死關頭真痛切。勸君念佛莫辭

頻。愚

痴人垂老不知休。喚殺朦朧未轉頭。毒病偏將醫作惡。沈疴翻與藥爲讐。愛繩易縛禽投檻。欲餌能牽魚上鈎。奉勸世緣宜早悟。蓮池種子尚堪投。痴

世間唯有苦人多。自造新殃可奈何。滿地蓬蒿春不到。一身枷鎖夜難過。稱冤莫更呼天地。叫痛應須念佛陀。三界從來是牢獄。勸君及早出娑婆。苦

莫道人閒樂事稠。由來樂極轉生憂。滿城華柳攜佳客。徹夜笙歌醉畫樓。但覺酒來人面上。寧知死在腳跟頭。西方淨土真爲樂。但念彌陀便往遊。樂

閒人念佛正優游。莫把光陰空裏投。老有音書頭漸白。死無官帖命難留。身前預把資糧辦。眼底休爲兒女愁。家在樂邦歸去好。自然衣食不須謀。閒

勸君念佛未能閒。等得閒來病現前。心到亂時須著眼。念

從忙處要加鞭。千軍隊裏單刀入。百沸湯中勺水傳。佛不礙忙忙自礙。便從今日奉金僊。忙

少年念佛正精神。莫待衰遲始問津。青艸半埋紅粉骨。黃泉多見黑頭人。獻珠龍女疾成佛。訪道善財還證真。一旦無常音信至。此時追悔欲何因。少

莫年光景苦無多。電影漚華一刹那。黃葉漸凋真老矣。秋風將至奈愁何。無心不用貪浮世。有口唯應念佛陀。珍重臨行須努力。莫教萬劫自蹉跎。老

疾病由來是藥方。深知生死是無常。重刑受過悲牢獄。劇苦嘗來厭革囊。念念彌陀休背覺。心心極樂願還鄉。何時

得受清虛體壽極河沙不可量。病

死時莫漫自驚惶

念佛人第一切忌怕死怕死則不得往生多有一生念佛臨終唯務服藥求醫

都不說著往生之事此怕死之過也

繫念殷勤向彼方。膿血漸拋皮袋子。腥

臊將脫垢衣裳。多生煩惱真痾瘵。一句彌陀是藥王。苦海

深沈但求出。莫愁佛不駕慈航。死

平日寅時天氣清。東方曉色已初生。法身未顯仍居暗。慧

眼纔開始見明。安得樂邦今日去。都將妄習一時平。遙思

供佛諸賢輩。衣裓盛華手自擎。寅時

卯時日出氣蒼茫。萬象明明不覆藏。香霧叢中華影亂。紅

塵隊裏馬蹄忙。想成處處青蓮萼。念熟時時大覺王。直待

無生生淨土。遍周沙界是毫光。卯時

食時萬戶起炊烟。貧富由來事太懸。茅屋糟糠猶不繼。朱門酒肉尚憎嫌。夢中苦樂原無實。覺後身心始不遷。安養此時應作食。遙知百味現其前。辰時

已時日影在禺中。恰恰還差分寸工。正念覺來猶有覺。妄心空處未忘空。邊邪那個非中正。偏曲何人不至公。攝受三根歸淨土。直教萬派盡朝宗。巳時

日輪當午正中天。普見高低物像全。阿鼻獄中真淨土。蜚身裏紫金僊。迷家蕩子殊堪愍。背父痴兒信可憐。今日始知歸故里。劫初田地尚依然。午時

未時窗外日初斜。華影闌珊上碧紗。三分光陰還過二。百年身世豈無涯。暫居此地非吾土。遙憶西方是我家。極樂人。民無量壽。不將日月計年華。未時

哺時薄晚正逢申。業識茫茫喪本真。瞻部洲中多苦事。娑婆界內少閒人。食中置毒寧知避。瘡後搔癢豈厭頻。日暮飄零不歸去。空勞望斷倚門親。申時

酉時憶佛甚懸懸。獨倚樓頭聳兩肩。眼逐浮雲凝碧落。心隨白日下青天。更無人去乾坤外。那有書來鴻雁邊。坐久不知天已暮。却疑身在玉池蓮。酉時

戌時萬事且休論。要把無常念念存。大恨忽來真黑夜。幽

關不曉是黃昏。持珠易念生前佛。剪紙難招死後魂。預辦
資糧早歸去。莫教前路悔無門。戌時

亥時人定絕喧囂。痛策身心莫漫憍。斬斷妄心青艸死。推
開昏暗黑山高。淚因憶佛渾難制。愁爲思鄉不易消。遙想
白蓮華萼上。定知名字已曾標。亥時

夜半子時羣動息。陰陽往復互回旋。一輪孤月千家夢。幾
點殘星萬里天。土自想成寧有外。佛從心現本無邊。何時
永滅遷流苦。華裏藏身出蓋纏。子時

丑時後夜曉鷄鳴。起坐披衣憶想清。一念未生真佛現。萬
緣纔動假名成。知緣不實名何礙。達妄無依念自平。安得

身心歸極樂。真空幻有總無生。時

春王正月是新年。賀歲家家設酒筵。萬戶笙歌行樂地。滿

街華月上燈天。目前景物難長好。劫外風光自不遷。安養

故鄉無蠟燭。枝枝相照玉池蓮。正

時當二月景堪誇。好念彌陀玩物華。淺白梨花初破朵。淡

黃楊柳乍抽芽。輕煙薄霧鶯兒店。細雨微風燕子家。爭似

故鄉佳麗地。七重行樹語頻伽。二

三月清明瞥眼過。傷心無那是愁何。滿城風雨歌聲少。十

里山墳哭響多。早趁在生修淨業。莫教臨死怨閻羅。故鄉

春色還長在。想見芙蓉出綠波。三

山林四月少塵埃。自念彌陀不用陪。新脫素衣摧粉籜。亂
拋金彈落黃梅。窮途作客真爲苦。蕩子思鄉最可哀。料得
慈尊應念我。朝朝垂手望歸來。四月

五月端陽景物偏。龍舟競渡古今傳。數莖蒲葉劍初礪。一
樹榴花火欲然。苦海無邊何日出。樂邦有路幾時還。玉池
流水洄漩處。陳陳香風泛白蓮。五月

六月人間暑氣高。炎炎火宅被焚燒。一林樹影藏高閣。十
里荷華映畫橋。念佛聲悲頻有淚。思鄉心切更無聊。清涼
池上何時返。滌盡煩襟水自饒。六月

新秋七月氣初涼。溽暑將收夜漸長。四壁暗風鳴蟋蟀。一

池衰草語寒蟻深宵倚檻窺殘月薄莫拊窗望夕陽客路

玲幄久漂泊苦求佛力早還鄉七月

中秋八月有微寒零露灑灑被草菅一樹桂華香漏逗萬

家明月影團圓長思故國無音信幾欲高飛少羽翰行樹

重重含佛土何時親倚玉欄看八月

重陽九日景偏賒自採茱萸且泛茶紅錦妝成千樹葉黃

金開盡一籬華每登山頂瞻鄉國初上樓頭望故家想見

七珍池沼內枝枝菡萏大如車九月

十月由來是小春桃紅初破一枝新長看舊冢添新冢每

見新人送舊人萬劫死生誰動念百年身世獨傷神回頭

便是西方路。只要當人願力真。十月

天涯又見一陽生。六管飛灰氣乍更。粒粒寒椒梅漸破。尖
尖嫩玉柳將萌。夜長易得還鄉夢。歲莫難爲作客情。十月
餘程安養國。寸心耿耿挂長庚。十一月

歲盡時窮最可愁。陰雲慘慘日悠悠。風剌萬木皆枯骨。雪
覆千山盡白頭。但見過年忙似箭。有誰離苦急如讐。那堪
尙滯娑婆國。夢裏光陰又一周。十一月

一自娑婆繫業因。多生流轉寔酸辛。須臾出屋又投屋。迤
迤捨身還受身。曾作王侯爭國邑。幾爲螻蟻喪埃塵。這回
若不思歸去。依舊從前受苦輪。

彌陀慈父願門開。攝受羣生等一孩。膿血團中離臭穢。蓮華香裏受胞胎。但憑淨願爲良導。只有狐疑是棄材。濁惡娑婆難久住。早同善友賦歸來。

八苦詩

生

業風吹識入。胞胎獄戶深。藏寶可哀。每遇飢虛倒懸下。頻驚粗食壓山來。聲聞到此心猶昧。菩薩於中慧未開。誓割愛緣生極樂。華中產取玉嬰孩。

老

萬事輸人已退藏。形骸自愧少康莊。朱顏一去杳無迹。華

髮新來漸有霜。流淚暗思童稚樂。見人空話壯年強。寧知淨土春長在。不使身心晝夜忙。

病

四大因時偶暫乖。此身無計可安排。殘燈留影不成夢。夜雨滴愁空滿街。自昔歡娛何處去。只今苦痛有誰懷。豈知極樂清虛體。自在遊行白玉階。

死

識神將盡忽無常。四大分離難主張。脫殼生龜真痛絕。落湯螃蟹漫悵惶。甘心獄戶爲囚侶。束手幽關事鬼王。何似華開親見佛。無生無滅壽難量。

愛別離

生離死別最堪傷。每話令人欲斷腸。虞氏帳中辭項羽。明妃馬上謝君王。淚深江海猶嫌淺。恨遠乾坤未是長。諸上善人俱會處。願教曠劫莫分張。

怨憎會

苦事人情皆欲避。誰知夙業自相招。有錢難買閻翁赦。無計能求獄卒饒。兵敗張巡思作鬼。身亡蕭氏願爲猫。何時得預蓮池會。積劫冤讐好共消。

求不得

窮達由來有夙因。轉生希望轉因循。揚帆屢見沈舟客。挂

榜偏傷落第人。畢世耕耘難果腹。頻年紡織尙懸鶉。樂那
衣食天然好。不用區區更苦辛。

五陰熾盛

色受想行識爲五陰。色陰是身。四陰是心。熾盛者熾然增盛也。

逼迫身心苦事多。哀聲無地可號呼。肝腸斷處情難斷。血
淚枯時恨未枯。臨海廿年持使節。過關一夜白頭顱。何當
淨土修禪觀。寂照同時離有無。

發願偈

稽首釋迦文。娑婆說法主。皈依無量壽淨土之導師。我今
承佛力。闡揚淨土教。詩成百八章。章各有八句。爲順此方
機。故以詩演說。若我所說語。違背於諸佛。欺罔世人者。應

受地獄苦。百千萬億劫。猶故不能盡。如其不然者。幸各生諦信。慎勿懷疑惑。而生增上慢。及以卑劣慢。由斯二種心。自致失善利。伏願見聞者。展轉遞相勸。若有勸一人。乃至於多人。功德不思議。譬喻莫能盡。願以此功德。普及於一切。我等與衆生。同生極樂國。

不淨觀頌 并敘

佛爲貪欲衆生說。不淨觀。觀之既久。貪欲卽除。可以越愛河而超苦海。余閒居閱大智度論。因取意而爲之頌。以此自警。并以警世云。

死想

先作此觀爲下九想張本

有愛皆歸盡。此身寧久長。替他空墮淚。誰解返思量。

脹想

記得穠華態。俄成疥脹。癢眼前。年少者容貌。竟何如。

青瘀想

紅白分明相。青黃瘀爛身。請君開眼看。不是兩般人。

壞想

皮肉旣墮落。五藏於中現。憑君徹底看。何處堪畱戀。

血塗想

無復朱顏在。空餘殷血塗。欲尋妍醜相。形質漸模糊。

膿爛想

腐爛應難覩。腥臊不可聞。豈知膿潰處。蘭麝昔曾熏。

噉想

羊犬食人肉。人曾食犬羊。不知人與畜。誰臭復誰香。

散想

形骸一已散。手足漸移置。諦觀斌媚姿。畢竟歸何處。

骨想

本是骷髏骨。曾將誑惑人。昔時看是假。今日觀方真。

燒想

火勢既猛烈。殘骸忽無有。試看烟燄中。著得貪心否。

前詩粗示端緒。尚未諦審觀察。復作五言律以廣之。

死想

所愛竟長別。淒涼不忍看。識才離故體。尸已下空棺。夜火
虛堂冷。秋風素幔寒。勸君身在日。先作死時觀。

脹想

風大鼓其內。須臾臍脹加。身如盛水袋。腹似斷藤瓜。垢膩
深塗炭。蠅蛆亂聚沙。曾因薄皮誑。翻悔昔年差。

青瘀想

風日久吹炙。青黃殊可憐。皮乾初爛橘。骨朽半枯椽。耳鼻
缺還在。筋骸斷復連。石人雖不語。對此亦潸然。

壞想

肌膚纔脫落。形質便遭傷。瓜裂半開肉。蛇鑽欲出腸。枯藤纏亂髮。濕蘚爛衣裳。寄語嬋娟子。休將畫糞囊。

血塗想

一片無情血。千秋不起人。淋漓塗宿草。狼藉污埃塵。莫辨妍媸相。安知男女身。哀哉痴肉眼。錯認假爲真。

膿爛想

薄皮糊破紙。爛肉弃陳羹。膿血從中潰。蠅蛆自外爭。食猪腸易嘔。洗狗水難清。不是深憎惡。何由斷妄情。

噉想

尸骸遭噉食。方寸少完全。不飽飢烏腹。難乾饒狗涎。當年

空自愛。此日有誰憐。不若猪羊肉。猶堪值幾錢。

散想

四體忽分散。一身何所從。豈唯姿態失。兼亦姓名空。長短看秋艸。穠纖問晚風。請君高著眼。此事細推窮。

骨想

皮肉已銷鑠。唯餘骨尚存。雨添苔蘚色。水浸土沙痕。牽挽多蟲蟻。收藏少子孫。風流何處去。愁殺未歸魂。

燒想

烈焰憑枯骨。須臾方熾然。紅飛天際火。黑透樹頭烟。妄念同灰盡。真心並日懸。欲超生死路。此觀要精研。

四念處頌 并敘

佛垂涅槃。囑諸比丘。依四念處住。如佛無異。今時丁未法。正念者少。顧此法門。何人修學。豈唯不思其義。抑亦未識其名。可勝歎邪。余山居無事。讀涅槃遺教品。因取其意。以入聲律。俾歌詠者。正念增長。妄心息滅。置諸座隅。日以自警。并不忘遺誠云。

觀身不淨

一與顛倒想。遂有幻緣身。膿血常交湊。腥臊每具陳。紙粘皮裏肉。藤絆骨纏筋。毛覆叢叢草。蟲居比比隣。內藏惟臭穢。外飾但衣巾。四大元無實。諸根豈有真。語言風自響。動

轉氣相循。強號爲男女。虛名立主賓。百年三尺土。萬古一堆塵。貴賤空回首。賢愚共愴神。徒生復徒死。誰識本來人。

觀受是苦

衆苦從何起。深知受著情。順違才領納。取捨便縱橫。有盛衰還至。無榮辱不成。怨從親裏出。哀是樂中生。王謝家何在。曹劉國已傾。悲歡幾場夢。勝敗一棋枰。事與心違背。貧將病合并。錢神呼不至。窮鬼送難行。戚戚終何益。悻悻漫不平。無求卑亦貴。知足欠還盈。若悟真空理。憂欣何處萌。

觀心無常

妄心無住處。體相竟如何。閃閃風中燭。搖搖水上波。一家

門戶別。六根六箇第兄多。六識擾擾各馳競。如眼逐色耳逐聲等紛紛總

不和。如眼不與聲和耳不與色和等青黃俄改換。眼識無常動靜屢遷訛。耳識無常

臭別香隨到。鼻識無常甜來淡又過。舌識無常炎涼易翻覆。身識無常好

惡每偏頗。意識無常境滅心安寄。情忘智亦孤。掀翻五欲窟。搗

盡六根窩。劫賊歸王化。飛禽出網羅。何當悟常住。諸妄盡

消磨。

觀法無我

諸佛從緣起。初無我主張。因緣有生滅。念慮遂低昂。欲得

翻成失。求閒反遇忙。畏寒冬不輟。苦熱夏偏長。貧憶富時

樂。老追年壯強。有誰憎順適。若箇好危亡。得失閒忙冷熱等皆從緣生不

因我自在方爲主。遷流豈是常。離根念何起。無識境還忘。
有內外無些子。中間有底藏。六窗虛寂寂。一室露堂堂。但得
塵勞盡。居然大覺王。

種樹歎

有樹如封殖。枝葉方欣欣。主人愛佳種。溉灌殊殷勤。長養
既有年。日望陵煙雲。土淺根未固。搖蕩風雨干。一朝遂傾
倒。根莖不復存。嗟哉復嗟哉。徒增主人歎。

題藍田叔畫蓮華佛國圖

蓮華佛國華爲宮。彼國人民相貌同。父彌陀兮兄大士。不
由乳養生華中。華之大兮如其體。或一二里至百里。光明

中有妙香生。自然清淨無倫比。慧爲食。分定爲飲。法身無老亦無病。德水充兮寶地平。何用畊田與鑿井。彼佛願力獨超卓。不遺五逆并十惡。信願持名苟不虧。他年定向蓮華託。藍君妙得丹青理。佛境重重筆端啟。法界收藏片紙閒。不覺恢恢有餘地。我觀淨土是真畫。爲君一一分明話。彌陀相好是畫佛。七寶莊嚴是畫土。九品衆生畫裏人。四色蓮華畫中座。畫境森羅在目前。求其實法無處所。畫人畫法旣無實。觀與觀者亦如是。妙觀無非空假中。非一非三又非二。與君同見畫彌陀。共詣西方入畫圖。親證唯心安樂土。還來度脫苦娑婆。

捨身祈雨歌 有錄

居士宋魁先者。明州人家。郡南門。平居奉佛甚誠謹。辛丑夏大旱。郡縣祈禱俱不應。出語人曰。我當致之。乃往天井山龍潭。投身而下。須臾雨大沛。旬日乃止。民賴以安。初居士之捨身也。問道於天井寺僧。僧目送之。見有雲自空起。少頃雨卽四注。僧疑而往探之。乃見居士跌坐水上。儼然不動。遂報其家。取其屍歸葬焉。噫。亦奇矣。昔我世尊行菩薩道。捨身無數。救度衆生。遂致成佛。今觀居士之事。頗亦類是。不謂之菩薩。吾不信也。乃作長歌以紀之。

辛丑之夏旱魃驕。亢陽作虐如刀。

煉萬物皆枯焦。金烏爍爍毛羽爛。火雲焰焰無所。

徂秋五十日。點滴不聞潤稻苗。田疇土地盡開拆。江河溪澗揚塵囂。井底之蛙尚不足。以自偷活。池魚性命焉能逃。農夫哀告聲嗷嗷。呼天不聞怨天高。布衲當盡留赤肉。田禾枯死無蓬蒿。是時郡縣計無出。爲民祈雨心切切。呼神遣鬼莫能應。方士咒術無功勞。奇哉大士爲衆生。徑往龍宮喚睡蛟。老龍當午睡不足。驚起平地翻波濤。龍潭之水何滔滔。其下鼃鼃常怒號。投身直下千萬丈。忽然湧出水面如浮瓢。一雨旬日始休息。邨原城市皆周遭。死者復蘇。

枯者潤。垂垂黍翻江郊。野航不覺入城市。柔櫓忽到門
前搖。勞者得休病者起。鄉人相賀鄰相邀。吁嗟乎。大士尋
常人不測。兒童婦女恒嘲調。一朝救世捨身命。直視四大
同漚泡。衆生之苦卽我苦。物我寧間於秋毫。但期一切得
安樂。身雖苦痛心陶陶。我聞人固有一死。或重泰山輕鴻
毛。此雨不從龍王降。亦非江海潮。直從大士悲心出。滴滴
點點化爲衆生血肉性命之脂膏。能使寒者衣。飢者食。亂
者治。逆者韜。黃金未爲貴。白玉何足高。大士不受功。此功
何處標。我作歌詩紀其事。畱與千古萬古長歌謠。

贈東阿居士二首

城南靜者居。高枕一床書。世事吾何有。齋心只宴如。折腰
休乞米。彈鋏不求魚。日夕相過從。秋風滿敝廬。

高蹈謝時輩。翛然遠市闈。分泉聊灌菊。補畫當看山。有愛
皆成癖。無求始自閒。不須隨物轉。當處悟無還。

將赴浙中留別朔方居士

遠公社裏舊遺民。世外相逢說往因。千里關山兩芒屨。半
瓢風月一閒身。扁舟細雨孤燈夜。殘雪寒梅古寺春。準擬
明年修白業。與君同作種蓮人。

灑水囊

護生方便最爲難。細行宜修莫自寬。性命由來無大小。死

生從此有交關。一毛去體猶知痛。滿蓋充腸豈忍餐。奉勸行人須仔細。朝朝蟲水要勤看。

禮塔紀事八首

并敘

己亥春三月。余從西泠渡江。詣四明阿育王山。瞻禮釋迦如來真身舍利寶塔。有德見師者。在寺禮塔。期滿八萬四千之數。留余同禮。余欣然就之。乃卽其處度夏。月餘。聞茲大師亦至。同時禮塔課誦之餘。三人談論佛法。相得甚歡。恨相見之晚。安居旣竟。余然一指供佛。因作詩紀其事。以見一時之勝槩云。

迦文滅度二千年。舍利于今尚燦然。自慶宿生何善利。得

瞻光相塔門前。

一顆如珠綴小鐘。青黃赤白現何窮。自心還見自心相。不是如來色不同。

佛身本自無生滅。舍利元從何處來。真佛現前當面錯。安將分別自驚猜。

殿含寶塔塔含空。刹刹塵塵本自融。八萬非多一非少。毫端應現寶王宮。

我佛三祇修福慧。功成萬古見遺勳。自家一顆光明種。久被塵埋直到今。

六時注想禮空王。懺悔殷勤不暫忘。月上塔尖人睡起。卻

疑舍利放毫光。

醫王雖去藥還留。慚愧癡兒病未瘳。讀罷涅槃遺教品。傷心不覺淚長流。

夏終供佛將何事。一指持將當燭燒。猶有無明燒未得。不隨殘焰一時消。

庚戌春三月。余禁足於梵天寺之西院右偏額。其室曰寸香齋。尊者相見略敘道話。數語寸香之外。念佛而已。作詩以見志。并告衆云。

省公鬻產構禪房。古寺重開淨業堂。盡埽萬緣如涕唾。憑將四字作資糧。同人共結三年社。對客空餘一寸香。三昧

未成功未熟。此生終不到城隍。

隅成四首

無能祇合住深山。一室蕭然獨掩關。寄語世人休見召。此生終不到人間。

百八輪珠六字經。消磨歲月度光陰。平生只有西歸願。肯爲他緣負此心。

爲善初勤鮮克終。願精一戒畢吾躬。從今日影過中後。粒米休將入口中。

破舟救溺理無由。抵死須撐到岸頭。等得篙師登陸後。更移新棹入中流。

念佛述懷

六字中間無賸法。等閒覷破祖師關。趙州不喜吾偏喜。公案從今要再翻。

辭世

身在華中佛現前。佛光來照紫金蓮。心隨諸佛往生去。無去來中事宛然。

省庵法師傳 附錄

師諱實賢。字思齊。一號省庵。常熟時氏子。世業儒。師生卽不茹葷。總角時有出塵志。父旣早歿。母張氏知其夙具善根。命爲釋氏子。七歲禮清涼庵僧容選爲師。聰慧爽明。經

與過日不忘。十五薙染。兼通世典。能詩善書法。前輩錢玉友許。賜谷皆執節與交。然未嘗頃刻忘生死大事也。性篤孝。母亡。於佛前跪諷報恩經。七七。歲時伏臘。必設像修供。他日至普仁寺。見一僧死仆地。師瞿然悟世無常。益加鞭策。年二十四。圓尸羅於昭慶。嚴習毘尼。不離衣鉢。日止一食。勝不帖席。率以爲常。庚寅。依渠成法師。聽講法華圓義。謁紹曇法師。聽唯識楞嚴。止觀諸部。晝夜研窮。未三夏。三觀十乘之旨。性相之學。無不通貫。曇師卽授記。荊傳靈峰四世天台正宗焉。甲午。叩靈鷲。和尙於崇福。參念佛是誰話。操持嚴密。四月。恍然契悟。曰。我夢覺矣。自是應機無

礙才辯縱橫。鷲欲付以衣拂。弗受辭去。爰禁足於真寂寺。日閱三藏梵筴。夕課西方佛名。二年期滿。寺衆請講法華。師升座開演。河懸泉湧。沛然莫禦。戊戌首春。止杭之隆興寺。紹曇汰師命師代講經律。每擊節稱善。己亥春。詣四明阿育王山。瞻禮舍利。先後五然指香供佛。每年佛涅槃日。講演遺教彌陀二經。示是心是佛之旨。三根普攝。法化洋溢。江浙黑白。傾心歸仰。歷有十載。汰筵之盛。甲於諸方。又嘗應永福普慶海雲諸禪席。每進院模範一新。清規肅穆。日講法華楞嚴諸部。執經問難者翕集座下。未幾。退隱杭城仙林寺。不出戶庭。力修淨業。己酉冬。杭人茅靜遠葉陞

皇甫子儀李執玉監院師省躬一輩等請主鳳山梵天講寺。於是屏絕諸緣。純提淨土。結長期。嚴立規約。晝夜六時。互相策勵。人皆謂永明再來也。先後主刹十餘載。得度弟子洎乞戒歸依者凡數百人。閒有學詩文者。師痛戒曰。人命在呼吸閒。那有閒工夫學世諦文字。稍一錯過。便成他世。欲望出離難矣哉。至癸丑佛成道日。謂弟子曰。我於明年四月十四日長往矣。自此掩關寸香齋。限晝夜課佛十萬聲。明年甲寅四月二日出關。十二日告衆曰。吾十日前見西方三聖降臨虛空。今再見矣。吾其生淨土乎。隨囑付院事。徧舜城中諸外護侍者以偈請。師書云。身在華中佛

現前佛光來照紫金蓮心。隨諸佛往生去。無去來中事。宛然書訖。曰。我十四日定往生矣。爾等爲我集衆念佛。十三日斷飲食。斂目危坐。五更具浴更衣。面西跌坐。至巳時遠近空集。雪涕膜拜。曰。願師住世度人。師復啟目。曰。我去卽來。生死事大。各自淨心念佛。言訖。合掌稱佛名而寂。少頃鼻筋下垂。顏色明潤。遂封龕。色不變。虞山上首無住師。以是歲臘月八日。函靈骨塔于琴川拂水巖之西。乾隆七年二月十五日。鄧山諸緇素懷師道行。迎骨去。重建塔育王寺之右。其舊塔以藏衣鉢云。師生于康熙二十四年八月初八日。春秋四十九。臘二十五。著淨土詩一百八首。注西

方發願文續往生傳東海若解舍利涅槃諸懺並行於世
乾隆十年歲次乙丑重陽日同學西庵律然述於三峯寂
照堂之右軒

省庵法師語錄卷下終